


徐氏醫學十六種

2

E. Chinese

Vol. II

2



自叙

醫小道也精義也重任也賤工也古者大人之學將以治天下國使無一夫不被其澤甚者天地位而萬物育斯學者之極功也若夫日救一人月治數病顧此失彼雖數十里之近不能兼及況乎不可治者又非使能起死者而使之生其道不已小子雖然古聖人之治病也通於天地之故究乎性命之源經絡臟腑氣血骨脈洞然如見然後察其受病之由用藥以驅除而調劑之其中自有玄機妙悟不可得而言喻者蓋與造化相維其義不亦精乎道小則有志之士有所不屑為義精則無識之徒有所不能窺也人之所係莫大乎生死王公大人聖賢豪傑可以旋轉乾坤而不能保無疾病之患一有疾病不得不聽之醫者而生殺唯命矣夫一人係天下之重而天下所係之人其命又懸於醫者下而一國一家所係之人更無論矣其任不亦重乎而猶是其人者又非有爵祿道德之人尊父兄師保之重既非世之所隆而其人之自視亦不過為衣服口食之計雖以一介之微呼之而立至其業不甚賤乎任重則托之者必得偉人工賤則業之者必無奇士所以勢出於相違而道因之易墜也余少時頗有志於窮經而骨肉數人疾病連年死亡略盡於是博覽方書寢食俱廢如是數年雖無生死肉骨之方實有尋本溯源之學九折臂而成醫至今尤信而竊慨唐宋以來無儒者為之振興視為下業逡巡失傳至理已失良法併亡惘然傷懷恐自今以往不復有生人之術不揣庸妄用數厥言倘有所補所全者或不僅一人一世已乎

乾隆丁丑秋七月洞溪徐大椿書於吳山之半松書屋

醫學源流論卷上目錄

目錄

經絡臟腑

元氣存亡論

軀殼經絡臟腑論

表裏上下論

陰陽升降論

治病必分經絡臟腑論

治病不必分經絡臟腑論

腎臟精論

一臟一腑先絕論

君火相火論

脈

診脈決死生論

脈症輕重論

脈症與病相反論

病

中風論

臟腑論

寒熱虛實真假論

內傷外感論

病情傳變論

病同人異論

病症不同論

病同因別論

亡陰亡陽論

病有不愈不死雖愈必死論

卒死論

病有鬼神論

腎虛非陰症論

吐血不死咳嗽必死論

胎產論

病有不必服藥論

方藥

方藥離合論

古方加減論

方劑古今論

單方論

禁方論

古今方劑大小論

藥誤不即死論

藥石性同用異論

剗劑論

製藥論

人參論

用藥如用兵論

執方治病論

湯藥不足盡病論

本草古今論

藥性變遷論

藥性專長論

煎藥法論

服藥法論

醫必備藥論

丸方論

熱藥誤人最烈論

薄貼論

貌似古方欺人論

醫學源流論卷上

吳江徐靈胎洄溪著

元氣存亡論

養生者之言曰天下之人皆可以無死斯言妄也何則人生自免乳哺以後始而孩既而長既而壯日勝一日何以四十以後飲食奉養如昔而日且就衰或者曰嗜慾戕之也則絕嗜慾可以無死乎或者曰勞動賊之也則戒勞動可以無死乎或者曰思慮擾之也則屏思慮可以無死乎果能絕嗜慾戒勞動減思慮免於疾病夭札則有之其老而眊眊而死猶然也況乎四十以前未嘗無嗜慾勞苦思慮然而日生日長四十以後雖無嗜慾勞苦思慮然而日減日消此其故何與蓋人之生也願夏蟲而却笑以為是物之生死何其促也而不知我實猶是耳當其受生之時已有定分焉所謂定分者元氣也視之不見求之不得附於氣血之內宰乎氣血之先其成形之時已有定數譬如置薪於火始然尚微漸久則烈薪力既盡而火熄矣其有久暫之殊者則薪之堅脆異質也故終身無病者待元氣之自盡而死此所謂終其天年者也至於疾病之人若元氣不傷雖病甚不死元氣或傷雖病輕亦死而其中又有辨焉有先傷元氣而病者此不可治者也有因病而傷元氣者此不可不預防者也亦有因誤治而傷及元氣者亦有元氣雖傷未甚尚可保全之者其等不一故診病決死生者不視病之輕重而視元氣之存亡則百不失一矣至所謂元氣者何所寄耶五臟有五臟之真精此元氣之分體者也而其根本所在即道經所謂丹田難經所謂命門內經所謂七節之旁中有小心陰陽闔闢存乎此呼吸出入係乎此無火而能令百體皆溫無水而能令五臟皆潤此中一線未絕則生氣一線未亡皆賴此也若夫有疾病而保全之法何如蓋元氣雖自有所在然實與臟腑相連屬者也寒熱攻補不得其道則實其實而虛其虛必有一臟大受其害邪

入於中而精不能續則元氣無所附而傷矣。故人之身無處不宜謹護而藥不可輕試也。若夫預防之道惟上工能慮在病前不使其勢已橫而莫救使元氣克全則自能託邪於外。若邪盛為害則乘元氣未動與之背城而一決勿使後事生悔。此神而明之術也。若欲與造化爭權而令天下之人終不死則無是理矣。

軀殼經絡臟腑論

凡致病必有因而受病之處則各有部位。今之醫者曰病必分經絡而後治之似矣。然亦知病固非經絡之所能盡者乎。夫人有皮肉筋骨以成形所謂軀殼也。而虛其中則有臟腑以實之。其連續貫通者則有經有絡貫乎臟腑之內。運乎軀殼之中。為之道路以傳變周流者也。故邪之傷人或在皮肉或在筋骨或在臟腑或在經絡有相傳者有不相傳者有久而相傳者有久而終不傳者。其大端則中於經絡者易傳其初不在經絡或病甚而流於經絡者亦易傳。經絡之病深入臟腑則以生尅相傳。惟皮肉筋骨之病不歸經絡者則不傳。所謂軀殼之病也。故識病之人當直指其病在何臟何腑何筋何骨何經何絡或傳或不傳其傳以何經始以何經終其言歷歷可驗則醫之明者矣。今人不問何病謬舉一經以藉口以見其頗識內經實與內經全然不解也。至於治之難易則在經絡者易治在臟腑者難治且多死在皮肉筋骨者難治亦不易死其大端如此。至於軀殼臟腑之屬於某經絡以審其針灸用藥之法則內經明言之深求自得也。

表裏上下論

欲知病之難易先知病之淺深欲知病之淺深先知病之部位。夫人身一也實有表裏上下之別焉。何謂表皮肉筋骨是也。何謂裏臟腑精神是也。而經絡則貫乎其間。表之病易治而難死裏之病難治而易死。

此其大略也而在表在裏者又各有難易此不可執一而論也若夫病本在表而傳於裏病本在裏而并及於表是為內外兼病尤不易治身半已上之病往往近於熱身半已下之病往往近於寒此其大略也而在上在下又各有寒熱此亦不可執一而論也若夫病本在上而傳於下病本在下而傳於上是之謂上下兼病亦不易治所以然者無病之處多有病之處少則精力猶可維持使正氣漸充而邪氣亦去若夫一人之身無處不病則以何者為驅病之本而復其元氣乎故善醫者知病勢之盛而必傳也豫為之防無使結聚無使泛濫無使併合此上工治未病之說也若其已至於傳則必先求其本後求其標相其緩急而施治之此又桑榆之收也以此決病之生死難易思過半矣

陰陽升降論

人身象天地天之陽藏於地之中者謂之元陽元陽之外護者謂之浮陽浮陽則與時升降若人之陽氣則藏於腎中而四布於周身惟元陽則固守於中而不離其位故太極圖中心白圈即元陽也始終不動其分陰分陽皆在白圈之外故發汗之藥皆鼓動其浮陽出於營衛之中以洩其氣耳若元陽一動則元氣漓矣是以發汗太甚動其元陽即有亡陽之患病深之人發喘呃逆即有陽越之虞其危皆在頃刻必用參附及重鎮之藥以墜安之所以治元氣虛弱之人用升提發散之藥最防陽氣散越此第一關也至於陰氣則不患其升而患其竭竭則精液不布乾枯燥烈廉泉玉英毫無滋潤舌燥唇焦皮膚粗禿所謂天氣不降地氣不升孤陽無附害不旋踵內經云陰精所奉其人壽故陰氣有餘則上溉陽氣有餘則下固其人無病病亦易愈反此則危故醫人者慎毋發其陽而竭其陰也

治病必分經絡臟腑論

病之從內出者必由於臟腑病之從外入者必由於經絡其病之情狀必有鑿鑿可徵者如怔忡驚悸為

心之病洩瀉臃脹為腸胃之病此易知者又有同一寒熱而六經各殊同一疼痛而筋骨皮肉各別又有臟腑有病而反現於肢節肢節有病而反現於臟腑若不究其病根所在而漫然治之則此之寒熱非彼之寒熱此之痛癢非彼之痛癢病之所在全不關著無病之處反以藥攻之內經所謂誅伐無過則故病未已新病復起醫者以其反增他病又復治其所增之病復不知病之所從來雜藥亂投愈治而病愈深矣故治病者必先分經絡臟腑之所在而又知其七情六淫所受何因然後擇何經何臟對病之藥本於古聖何方之法分毫不爽而後治之自然一劑而即見效矣今之治病不效者不咎已藥之不當而反咎病之不應藥此理終身不悟也

治病不必分經絡臟腑論

病之分經絡臟腑夫人知之於是天下遂有因經絡臟腑之說而拘泥附會又或誤認穿鑿并有借此神其說以欺人者蓋治病之法多端有必求經絡臟腑者有不必求經絡臟腑者蓋人之氣血無所不通而藥性之寒熱溫涼有毒無毒其性亦一定不移入於人身其功能亦無所不到豈有其藥止入某經之理即如參耆之類無所不補砒鴆之類無所不毒並不高於一處也所以古人有現成通治之方如紫金錠至寶丹之類所治之病甚多皆有奇效蓋通氣者無氣不通解毒者無毒不解消疫者無疫不消其中不過略有專宜耳至張潔古輩則每藥註定云獨入某經皆屬附會之說不足徵也曰然則用藥竟不必分經絡臟腑耶曰此不然也蓋人之病各有所現之處而藥之治病必有專長之功如柴胡治寒熱往來能愈少陽之病桂枝治畏寒發熱能愈太陽之病葛根治肢體大熱能愈陽明之病蓋其止寒熱已畏寒除大熱此乃柴胡桂枝葛根專長之事因其能治何經之病後人即指為何經之藥孰知其功能實不僅入少陽太陽陽明也顯然者尚如此餘則更無影響矣故以某藥為能治某經之病則可以某藥為獨治某

經則不可謂其經之病當用其藥則可謂其藥不復入他經則不可故不知經絡而用藥其失也必無捷效執經絡而用藥其失也泥反能致害總之變化不一神而明之存乎其人也

腎藏精論

精藏於腎人盡知之至精何以生何以藏何以出則人不知也夫精即腎中之脂膏也有長存者有日生者腎中有藏精之處充滿不缺如井中之水日夜充盈此長存者也其慙動交媾所出之精及有病而滑脫之精乃日生者也其精旋去旋生不去亦不生猶井中之水日日汲之不見其虧終年不汲不見其益易云井道不可不革故受之以革其理然也曰然則縱慙可無害乎曰是又不然蓋天下之理總歸自然有腎氣盛者多慾無傷腎氣衰者自當節養左傳云女不可近乎對曰節之若縱慙不節如淺挾之井及之無度則枯竭矣曰然則強壯之人而絕慾則何如曰此亦無咎無譽惟腎氣略堅寔耳但必浮火不動陰陽相守則可耳若浮火日動而強制之則反有害蓋精因火動而離其位則必有頭眩目赤身痒腰疼遺洩偏墜等症甚者或發癱疽此強制之害也故精之為物慾動則生不動則生能自然不動則有益強制則有害過用則衰竭任其自然而無所勉強則保精之法也老子云天法道道法自然自然之道乃長生之訣也

一臟一腑先絕論

人之死大約因元氣存亡而決故患病者元氣已傷即變危殆蓋元氣脫則五臟六腑皆無氣矣竟有元氣深固其根不搖而內中有一臟一腑先絕者如心絕則昏昧不知世事肝絕則喜怒無節腎絕則陽痿痿縮脾絕則食入不化肺絕則氣促聲啞六腑之絕而失其所司亦然其絕之象亦必有顯然可見之處大約其氣尚存而神志精華不用事耳必明醫乃能決之又諸臟腑之中惟肺絕則死期尤促蓋肺為臟

腑之華蓋。臟腑賴其氣以養。故此臟絕。則臟腑皆無稟受矣。其餘則視其絕之甚與不甚。又觀其別臟之盛衰何如。更觀其後天之飲食何如。以此定其吉凶。則修短之期可決矣。然大段亦無過一年者。此皆得之目。概非臆說也。

君火相火論

近世之論心火。謂之君火。腎火謂之相火。此說未安。蓋心屬火。而位居於上。又純陽而為一身之主。名曰君火。無異議也。若腎中之火。則與心相遠。乃水中之火也。與心火不類。名為相火。似屬非宜。蓋陰陽互藏。其宅心固有火。而腎中亦有火。心火為火中之火。腎火為水中之火。腎火守于下。心火守于上。而三焦為火之道路。能引二火相交。心火動。而腎中之浮火亦隨之。腎火動。而心中之浮火亦隨之。亦有心火動而腎火不動。其患獨在心。亦有腎火動而心火不動。其害獨在腎。故治火之法。必先審其何火。而後用藥。有定品。治心火。以苦寒。治腎火。以鹹寒。若二臟之陰不足。以配火。則又宜取二臟之陰藥補之。若腎火飛越。又有回陽之法。反宜用溫熱。與治心火迥然不同。故五臟皆有火。而心腎二臟為易動。故治法宜詳究也。若夫相火之說。則心胞之火。能令人怔忡面赤。煩躁眩暈。此則在君火之旁。名為相火。似為確切。試以內經參之。自有真見也。

診脈決死生論

生死於人大矣。而能於兩手方寸之地。微末之動。即能決其生死。何其近于誣也。然古人往往百不失一者。何哉。其大要則以胃氣為本。蓋人之所以生。本乎飲食。靈樞云。穀入于胃。乃傳之肺。五臟六腑皆以受氣。寸口屬肺經。為百脈之所會。故其來也。有生氣以行乎其間。融和調暢。得中土之精英。此為有胃氣得者。生。失者死。其大較也。其次則推天運之順逆。人氣與天氣相應。如春氣屬木。脈宜弦。夏氣屬火。脈宜洪。

之類反是則與天氣不應。又其次則審臟氣之生剋。如脾病畏弦木剋土也。肺病畏洪火剋金也。反是則與臟氣無害。又其次則辨病脈之從違。病之與脈各有宜與不宜。如脫血之後脈宜靜細而反洪大則氣亦外脫矣。寒熱之症脈宜洪數而反細弱則真元將陷矣。至于真臟之脈乃因胃氣已絕不營五臟所以何臟有病則何臟之脈獨現。凡此皆內經難經等書言之明白詳盡。學者苟潛心觀玩洞然易曉。此其可決者也。至云診脈即可以知何病。又云人之死生無不能先知。則又非也。蓋脈之變遷無定。或有卒中之邪未即通于經絡而脈一時未變者。或病輕而不能現于脈者。或有沈痼之疾久而與氣血相併一時難辨其輕重者。或有依經傳變流動無常不可執一時之脈而定其是非者。況病之名有萬而脈之象不過數十種。且一病而數十種之脈無不可見。何能診脈而即知其何病。此皆推測偶中。以此欺人也。若夫真臟之脈臨死而終不現者。則何以決之。是必以望聞問三者合而參觀之。亦百不失一矣。故以脈為可憑而脈亦有時不足憑。以脈為不可憑而又鑿鑿乎其可憑。總在醫者熟通經學更深思自得。則無所不驗矣。若世俗無稽之說皆不足聽也。

症脈輕重論

人之患病不外七情六淫。其輕重死生之別醫者何由知之。皆必問其症。切其脈而後知之。然症脈各有不同。有現症極明而脈中不見者。有脈中甚明而症中不見者。其中有宜從症者。有宜從脈者。必有一定之故。審之既真。則病情不能逃。否則不為症所誤。必為脈所誤矣。故宜從症者。雖脈極順而症危亦斷其必死。宜從脈者。雖症極凶而脈和亦決其必生。如脫血之人。形如死狀。危在頃刻。而六脈有根。則不死。此宜從脈不從症也。如瘦厥之人。六脈或促或絕。疫降則愈。此宜從症不從脈也。陰虛咳嗽。飲食起居如常。而六脈細數。久則必死。此宜從脈不宜從症也。噎膈反胃。脈如常人。久則胃絕而脈驟變。百無一生。此又

宜從症不從脈也如此之類甚多不可枚舉總之脈與症分觀之則吉凶兩不可憑合觀之則某症忌某脈某脈忌某症其吉凶乃可定矣又如肺病忌脈數肺屬金數為火火刑金也餘可類推皆不外五行生剋之理令人不按其症而徒講乎脈則講之愈密失之愈遠若脈之全體則內經諸書詳言之矣

脈症與病相反論

症者病之發現者也病熱則症熱病寒則症寒此一定之理然症竟有與病相反者最易誤治此不可不知者也如冒寒之病反身熱而惡熱傷暑之病反身寒而惡寒本傷食也而反易飢能食本傷飲也而反大渴口乾此等之病尤當細考一或有誤而從症用藥即死生判矣此其中蓋有故焉或一時病勢未定如傷寒本當發熱其時尚未發熱將來必至于發熱此先後之不同也或內外異情如外雖寒而內仍熱是也或有名無實如欲食好飲及至少進即止飲食之後又不易化是也或有別症相雜誤認此症為彼症是也或此人舊有他病新病方發舊病亦現是也至於脈之相反亦各不同或其人本體之脈與常人不同或輕病未現於脈或疫氣阻塞營氣不利脈象乖其所之或一時為邪所閉脈似危險氣通即復或其人本有他症仍其舊症之脈凡此之類非一端所能盡總宜潛心體認審其真實然後不為脈症所惑否則徒執一己之見用藥愈真而愈誤矣然苟非辨症極精脈理素明鮮有不惑者也

中風論

今之患中風偏痺等病者百無一愈十死其九非其症俱不治皆醫者誤之也凡古聖定病之名必指其實名曰中風則其病屬風可知既為風病則主病之方必以治風為本故仲景侯氏黑散風引湯防己地黃湯及唐人大小續命等方皆多用風藥而因症增減蓋以風入經絡則內風與外風相煽以致痰火一時壅塞惟宜先驅其風繼清痰火而後調其氣血則經脈可以漸通令人一見中風等症即用人參熟地

附子肉桂等純補溫熱之品將風火痰氣盡行補住輕者變重重者即死或有元氣未傷而感邪淺者亦必遷延時日以成偏枯永廢之人此非醫者誤之耶或云邪之所湊其氣必虛故補正即所以驅邪此大繆也惟其正虛而邪湊尤當急驅其邪以衛其正若更補其邪氣則正氣益不能支矣即使正氣全虛不能托邪於外亦宜於驅風藥中少加扶正之品以助驅邪之力從未有純用溫補者譬之盜賊入室定當先驅盜賊而後固其墻垣未有盜賊未去而先固其墻垣者或云補藥托邪猶之增家人以御盜也是又不然蓋服純補之藥斷無專補正不補邪之理非若家人之專於禦盜賊也是不但不驅盜并助盜矣况治病之法凡久病屬虛驟病屬實所謂虛者謂正虛也所謂實者謂邪實也中風乃急暴之症其為實邪無疑天下未有行動如常忽然大虛而昏仆者豈可不以實邪治之哉其中或有屬陰虛陽虛感實感寒之別則於治風方中隨所現之症加減之漢唐諸法具在可取而觀也故凡中風之類苟無中臟之絕症未有不可治者余友人患此症者遵余治法病一二十年而今尚無恙者甚多惟服熱補者無一存者矣

臆膈論

臆膈同為極大之病然臆可治而膈不可治蓋臆者有物積中其症屬實膈者不能納物其症屬虛實者可治虛者不可治此其常也臆之為病因腸胃衰弱不能運化或痰或血或氣或食凝結於中以致臆膈脹滿治之當先下其結聚然後補養其中氣則腸胃漸能消化矣內經有難矣醴方即治法也後世治臆之方亦多見效惟臆氣已絕臂細臍凸手心及背平滿青筋繞腹種種惡症齊現則不治若膈症乃肝火犯胃木來侮土謂之賊邪胃脘枯槁不復用事惟留一線細竅又為痰涎瘀血閉塞飲食不能下達即勉強納食仍復吐出蓋人生全在飲食經云穀入于胃以傳于肺五臟六腑皆以受氣今食既不入則五臟六腑皆竭矣所以得此症者能少納穀則不出一年而死全不納穀則不出半年而死凡春得病者死于

秘秋得病者死于春蓋金木相尅之時也又有卒然嘔吐或嘔吐而時止時發又或年當少壯是名反胃非膈也此亦可治至於類臟之症如浮腫水腫之類或宜針灸或宜洩瀉病象各殊治亦萬變醫者亦宜廣求諸法而隨宜施用也

寒熱虛實真假論

病之大端不外乎寒熱虛實然必辨其真假而後治之無誤假寒者寒在外而熱在內也雖大寒而惡熱飲假熱者熱在外而寒在內也雖大熱而惡寒飲此其大較也假實者形實而神衰其脈浮洪孔散也假虛者形衰而神全其脈靜小堅實也其中又有人之虛實症之虛實如怯弱之人而傷寒傷食此人虛而症實也強壯之人而失血勞倦此人實而症虛也或宜正治或宜從治或宜分治或宜合治或宜從本或宜從標寒因熱用熱因寒用上下異方煎丸異法補中兼攻中兼補精思妙術隨變生機病勢千端立法萬變則真假不能惑我之心亦不能窮我之術是在博求古法而神明之稍執已見或學力不至其不為病所惑者幾希矣

內傷外感論

七情所病謂之內傷六淫所侵謂之外感自內經難經以及唐宋諸書無不言之深切者明矣二者之病有病形同而病因異者亦有病因同而病形異者又有全乎外感全乎內傷者更有內傷兼外感外感兼內傷者則因與病又互相出入參錯雜亂治法迥殊蓋內傷由於神志外感起於經絡輕重淺深先後緩急或分或合一或有誤為害非輕能熟於內經及仲景諸書細心體認則雖其病萬殊其中條理井然毫無疑似出入變化無有不效否則徬徨疑慮雜藥亂投全無法紀屢試不驗更無把握不咎己之審病不明反咎藥之治病不應如此死者醫殺之耳

病情傳變論

病有一定之傳變。有無定之傳變。一定之傳變。如傷寒太陽傳陽明。及金匱見肝之病。知肝傳脾之類。又如痞病變臑血虛。變浮腫之類。醫者可豫知而防之也。無定之傳變。或其人本體先有受傷之處。或天時不和。又感時行之氣。或調理失宜。更生他病。則無病不可變。醫者不能豫知而為防者也。總之人有一病。皆當加意謹慎。否則病後增病。則正虛而感益重。輕病亦變危矣。至於既傳之後。則標本緩急先後分合。用藥必兩處兼顧。而又不雜不亂。則諸病亦可漸次平復。否則新病日增。無所底止矣。至于藥誤之傳變。又復多端。或過于寒涼。而成寒中之病。或過服溫燥。而成熱中之病。或過于攻伐。而元氣大虛。或過于滋潤。而脾氣不實。不可勝舉。近日害人最深者。大病之後。邪未全退。又不察病氣所傷何處。即用附子肉桂。熟地麥冬人參白朮五味芫肉之類。將邪火盡行補瀆。始若相安。久之氣逆痰升。脹滿昏沉。如中風之狀。邪氣與元氣相併。諸藥無效。而死。醫家病家。猶以為病後大虛所致。而不知乃邪氣固結而然也。余見甚多。不可不深戒。

病同人異論

天下有同此一病。而治此則效。治彼則不效。且不惟無效。而反有大害者。何也。則以病同而人異也。夫七情六淫之感不殊。而受感之人各殊。或氣體有強弱。質性有陰陽。生長有南北。性情有剛柔。筋骨有堅脆。肢體有勞逸。年力有老少。奉養有膏粱藜藿之殊。心境有憂勞和樂之別。更加天時有寒暖之不同。受病有深淺之各異。一概施治。則病情雖中。而於人之氣體迥乎相反。則利害亦相反矣。故醫者必細審其人。之種種不同。而後輕重緩急。大小先後之法。因之而定。內經言之極詳。即針灸及外科之治法。盡然。故凡治病者。皆當如是審察也。

病症不同論

凡病之總者謂之病而一病必有數症如太陽傷風是病也其惡風身熱自汗頭痛是症也合之而成其為太陽病此乃太陽病之本症也若太陽病而又兼泄瀉不寐心煩痞悶則又為太陽病之兼症矣如瘧病也往來寒熱嘔吐畏風口苦是症也合之而成為瘧此乃瘧之本症也若瘧而兼頭痛脹滿噉逆便閉則又為瘧疾之兼症矣若瘧而又下痢數十行則又不得謂之兼症謂之兼病蓋瘧為一病痢又為一病而二病又各有本症各有兼症不可勝舉以此類推則病之與症其分併何啻千萬不可不求其端而分其緒也而治之法或當合治或當分治或當先治或當後治或當專治或當不治尤在視其輕重緩急而次第奏功一或倒行逆施雜亂無紀則病變百出雖良工不能挽回矣

病同因別論

凡人之所苦謂之病所以致此病者謂之因如同一身熱也有風有寒有痰有食有陰虛火升有鬱怒憂思勞怯蟲症此謂之因知其因則不得專以寒涼治熱病矣蓋熱同而所以致熱者不同則藥亦迥異凡病之因不同而治各別者盡然則一病而治法多端矣而病又非止一症必有兼症焉如身熱而腹痛則腹又為一症而腹痛之因又復不同有與身熱相合者有與身熱各別者如感寒而身熱其腹亦因寒而痛此相合者也如身熱為寒其腹痛又為傷食則各別者也又必審其食為何食則以何藥消之其立方之法必切中二者之病源而後定方則一藥而兩病俱安矣若不問其本病之何因及兼病之何因而徒曰某病以某方治之其偶中者則投之或愈再治他人則不但不愈而反增病必自疑曰何以治彼效而治此不效并前此之何以愈亦不知之則倖中者甚少而誤治者甚多終身治病而終身不悟歷症愈多而愈惑矣

亡陰亡陽論

經云奪血者無汗奪汗者無血血屬陰是汗多乃亡陰也故止汗之法必用涼心斂肺之藥何也心主血汗為心之液故當清心火汗必從皮毛出肺主皮毛故又當斂肺氣此正治也惟汗出太甚則陰氣上竭而腎中龍雷之火隨水而上若以寒涼折之其火愈熾惟用大劑參附佐以鹹降之品如童便牡蠣之類冷飲一椀直達下焦引其真陽下降則龍雷之火反乎其位而汗隨止此與亡陰之汗真大相懸絕故亡陰亡陽其治法截然而轉機在頃刻當陽氣之未動也以陰藥止汗及陽氣之既動也以陽藥止汗而龍骨牡蠣黃耆五味收澀之藥則兩方皆可隨宜用之醫者能於亡陰亡陽之交分其界限則用藥無誤矣其亡陰亡陽之辨法何如亡陰之汗身畏熱手足溫肌熱汗亦熱而味鹹口渴喜涼飲氣粗脈洪實此其驗也亡陽之汗身反惡寒手足冷肌涼汗冷而味淡微粘口不渴而喜熱飲氣微脈浮數而空此其驗也至於尋常之正汗熱汗邪汗自汗又不在二者之列此理知者絕少即此汗之一端而聚訟紛紛毫無定見誤治甚多也

病有不愈不死雖愈必死論

能愈病之非難知病之必愈必不愈為難夫人之得病非皆死症也庸醫治之非必皆與病相反也外感內傷皆有現症約略治之自能向愈況病情輕者雖不服藥亦能漸痊即病勢危迫醫者苟無大誤邪氣漸退亦自能向安故愈病非醫者之能事也惟不論輕重之疾一見即能決其死生難易百無一失此則學問之極功而非淺嘗者所能知也夫病輕而預知其愈病重而預知其死此猶為易知者惟病象甚輕而能決其必死病勢甚重而能斷其必生乃為難耳更有病已愈而不久必死者蓋邪氣雖去而其人之元氣與病俱亡一時雖若粗安真氣不可復續如兩虎相角其一雖勝而力已脫盡雖良工亦不能救也

又有病必不愈而人亦不死者。蓋邪氣盛而元氣堅固。邪氣與元氣相併。大攻則恐傷其正。小攻則病不為動。如油入麵。一合則不可復分。而又不至於傷生。此二者皆人之所不知者也。其大端則病氣入臟腑者。病與人俱盡者為多。病在經絡骨脈者。病與人俱存者為多。此乃內外輕重之別也。斯二者方其病之始形。必有可微之端。良工知之。自有防微之法。既不使之與病俱亡。亦不使之終身不愈。此非深通經義之人。必不能窮源極流。挽回於人所不見之地也。

卒死論

天下卒死之人甚多。其故不一。內中可救者十之七八。不可救者僅十之二三。惟一時不得良醫。故皆枉死耳。夫人內外無病。飲食行動如常。而忽然死者。其臟腑經絡本無受病之處。卒然感犯外邪。如惡風穢氣。鬼邪毒厲等物。閉塞氣道。一時不能轉動。則大氣阻絕。昏悶迷感。久而不通。則氣愈聚愈塞。如繫繩於頸。氣絕則死矣。若醫者能知其所犯何故。以法治之。通其氣。驅其邪。則立愈矣。又有疫疰壅塞。沮遏氣道。而卒死者。通氣降痰。則甦。所謂痰厥之類是也。以前諸項良醫皆能治之。惟臟絕之症。則不治。其人或勞心思慮。或酒食不節。或房慾過度。或惱怒不常。五臟之內。精竭神衰。惟一線真元未斷。行動如常。偶有感冒。其元氣一時斷絕。氣脫神離。頃刻而死。既不可救。又不及救。此則卒死之最急而不可治者也。至於暴遇神鬼。適逢冤譴。此又怪異之事。不在疾病之類矣。

病有鬼神論

人之受邪也。必有受之之處。有以召之。則應者斯至矣。夫人精神完固。則外邪不敢犯。惟其所以禦之。具有虧。則侮之者斯集。凡疾病有為鬼神所憑者。其愚魯者。以為鬼神實能禍人。其明理者。以為病情如此。必無鬼神。二者皆非也。夫鬼神猶風寒暑濕之邪耳。衛氣虛則受寒。榮氣虛則受熱。神氣虛則受鬼。蓋

人之神屬陽陽衰則鬼憑之內經有五臟之病則現五色之鬼難經云脫陽者見鬼故經穴中有鬼牀鬼室等穴此諸穴者皆賴神氣以充塞之若神氣有虧則鬼神得而憑之猶之風寒之能傷人也故治寒者壯其陽治熱者養其陰治鬼者充其神而已其或有因疫因思因驚者則當求其本而治之故明理之士必事事窮其故乃能無所惑而有據否則執一端之見而昧事理之實均屬憤憤矣其外更有觸犯鬼神之病則祈禱可愈至於寬謹之鬼則有數端有自作之孽深仇不可解者有祖宗貽累者有過誤害人者其事皆鑿鑿可徵似儒者所不道然見於經史如公子彭生伯有之類甚多目覩者亦不少此則非藥石祈禱所能免矣

腎虛非陰症論

令之醫者以其人房勞之後或遺精之後感冒風寒而發熱者謂之陰症病者遇此亦自謂之陰症不顧其現症何如總用參朮附桂乾姜地黃等溫熱峻補之藥此可稱絕倒者也夫所謂陰症者寒邪中于三陰經也房後感風豈風寒必中腎經即使中之亦不過散少陰之風寒如傷寒論中少陰發熱仍用麻黃細辛發表而已豈有用辛熱溫補之法耶若用溫補則補其風寒於腎中矣況陰虛之人而感風寒亦必由太陽入仍屬陽邪其熱必甚兼以燥悶煩渴尤宜清熱散邪豈可反用熱藥若果直中三陰則斷無壯熱之理必有惡寒倦臥厥冷喜熱等症方可用溫散然亦終無用滋補之法即如傷寒差後房事不慎又發寒熱謂之女勞復此乃久虛之人復患大症依今人之見尤宜峻補者也而古人治之用竹皮一升煎湯服然則無病而房後感風更不宜用熱補矣故凡治病之法總視目前之現證現脈如果六脈沉遲表裏皆畏寒的係三陰之寒證即使其本領強壯又絕慾十年亦從陰治若係所現脈證的係陽邪發熱煩渴並無三陰之症即使其人本體虛弱又復房勞過度亦從陽治如傷寒論中陽明大熱之證宜用葛根

白虎等方者。瞬息之間。轉入三陰。即改用溫補。若陰症轉陽。症亦即用涼散。此一定之法也。近世惟喻嘉言先生能知此義。有寓意草中黃長人之傷寒案可見。餘人皆不知之。其殺人可勝道哉。

吐血不死咳嗽必死論

今之醫者謂吐血為虛勞之病。此大謬也。夫吐血有數種。大概咳者成勞。不咳者不成勞。間有吐時偶咳者。當其吐血之時。狼狽頗甚。吐血即痊。皆不成勞。何也。其吐血一止。則週身無病。飲食如故。而精神生矣。即使亡血之後。或陰虛內熱。或筋骨痠痛。皆可服藥而痊。若咳嗽則血止而病仍在。日嗽夜嗽。瘦瘵壅氣。升多則三年少。少則一年而死矣。蓋咳嗽不止。則腎中之元氣震蕩不寧。肺為腎之母。母病則子亦病。故也。又肺為五臟之華。蓋經云。穀氣入胃。以傳於肺。五臟六腑皆以受氣。其清者為榮。濁者為衛。是則臟腑皆取精於肺。肺病則不能輸精於臟腑。一年而臟腑皆枯。三年而臟腑竭矣。故咳嗽為真勞不治之疾也。然亦有咳嗽而不死者。其嗽亦有時稍緩。其飲食起居不甚變。又其人善於調攝。延至三年之後。起居如舊。間或一發。靜養即愈。此乃百中難得一者也。更有不咳之人。血症屢發。肝竭肺傷。亦變咳嗽。久而亦死。此則不善調攝。以輕變重也。執此以決血症之死生。百不一失矣。

胎產論

婦科之最重者。二端。墮胎與難產耳。世之治墮胎者。往往純用滋補。治難產者。往往專於攻下。二者皆非也。蓋半產之故。非一端。由於虛滑者。十之一二。由於內熱者。十之八九。蓋胎惟賴血以養。故得胎之後。經事不行者。因衝任之血。皆為胎所吸。無餘血下行也。苟血或不足。則胎枯竭而下墮矣。其血所以不足之故。皆由內熱火盛。陽旺而陰虧也。故古人養胎之方。專以黃芩為主。又血之生。必由於脾胃。經云。榮衛之道。納穀為寶。故又以白朮佐之。乃世之人。專以參耆補氣。熟地滯胃。氣旺則火盛。胃濕則不運。生化之源。

衰而血益少矣。至於產育之事，乃天地化育之常本，無危險之理。險者，予不得一世之遭厄難者，乃人事之未工也。其法在乎產婦不可令早用力。蓋胎必轉而後下，早用力則胎先下墜，斷難舒轉。於是橫生倒產之害生。又用力則胞漿驟下，胎已枯澀，何由能產。此病不但產子之家不知，即收生穩婦亦有不知者。至於用藥之法，則交骨不開，胎元不轉，種種諸症，各有專方。其外或宜潤或宜降，或宜溫或宜涼，亦當隨症施治。其大端以養血為主。蓋血足則諸症自退也。至於易產強健之產婦，最多卒死，蓋大脫血之後，衝任空虛，經脈嬌脆，健婦不以為意，輕舉妄動，用力稍重，衝脈斷裂，氣冒血崩，死在頃刻。尤忌舉手上頭，如是死者，吾見極多。不知者以為奇異，實理之常，生產之家不可不知也。

病有不必服藥論

天下之病，竟有不宜服藥者。如黃疸之類是也。黃疸之症，仲景原有煎方。然輕者用之俱效，而重者俱不效。何也？蓋疸之重者，其胸中有囊，以裹黃水。其囊並無出路，藥祇在囊外，不入囊中，所服之藥非補邪，即傷正。故反有害。若輕病則囊尚未成，服藥有效。至囊成之後，則百無一效。必須用輕透之方，或破其囊，或消其水。另有秘方傳授，非泛然煎丸之所能治也。痰飲之病，亦有囊。常藥亦不能愈。外此如吐血、久痞等疾，得藥之益者甚少。受藥誤者甚多。如無至穩必效之方，不過以身試藥，則益以不服藥為中醫矣。

方藥離合論

方之與藥，似合而實離也。得天地之氣，成一物之性，各有功能，可以變易血氣，以除疾病。此藥之力也。然草木之性，與人殊體，入人腸胃，何以能如人之所欲，以致其效？聖人為之製方，以調劑之。或用以專攻，或用以兼治，或相輔者，或相反者，或相用者，或相制者。故方之既成，能使藥各全其性，亦能使藥各失其性。操縱之法，有大權焉。此方之妙也。若夫按病用藥，藥雖切中，而立方無法，謂之有藥無方。或守一方以治

病方雖良善而其藥有一二味與病不相關者謂之有方無藥譬之作書之法用筆已工而配合顛倒與夫字形俱備而點畫不成者皆不得謂之能書故善醫者分觀之而無藥弗切於病情合觀之而無方不本於古法然後用而弗效則病之故也非醫之罪也而不效者即偶或取效隱害必多則亦同於殺人而已矣至於方之大小奇偏之法則內經詳言之茲不復贅云

古方加減論

古人製方之義微妙精詳不可思議蓋其審察病情辨別經絡參考藥性斟酌輕重其於所治之病不爽毫髮故不必有奇品異術而沈痼艱險之疾投之輒有神效此漢以前之方也但生民之疾病不可勝窮若必每病製一方是曷有盡期乎故古人即有加減之法其病大端相同而所現之症或不同則不必更立一方即於是方之內因其現症之異而為之加減如傷寒論中治太陽病用桂枝湯若見項背強者則用桂枝加葛根湯喘者則用桂枝加厚朴杏子湯下後脈促胸滿者桂枝去芍湯更惡寒者去芍芍加附子湯此猶以藥為加減者也若桂枝麻黃各半湯則以兩方為加減矣若發奔豚者用桂枝為加桂枝湯則又以藥之輕重為加減矣然一二味加減雖不易本方之名而必明著其加減之藥若桂枝湯倍用芍藥而加飴糖則又不名桂枝加飴糖湯而為建中湯其藥雖同而義已別則立名亦異古法之嚴如此後之醫者不識此義而又欲托名用古取古方中一二味則即以某方目之如用柴胡則即曰小柴胡湯不知小柴胡之力全在人參也用猪苓澤瀉即曰五苓散不知五苓之妙專在桂枝也去其要藥雜以他藥而仍以某方目之用而不效不知自咎或則歸咎於病或則歸咎於藥以為古方不可治令病嗟乎即使果識其病而用古方支離零亂豈有效乎遂相戒以為古方難用不知全失古方之精義故與病毫無益而反有害也然則當何如曰能識病情與古方合者則全用之有別症則據古法加減之如不盡合則

依古方之法將古方所用之藥而去取損益之必使無一藥之不對症自然不倍於古人之法而所投必有神效矣。

方劑古今論

後世之方已不知幾億萬矣。此皆不足以名方者也。昔者聖人之製方也。推藥理之本原。識藥性之專能。察氣味之從逆。審臟腑之好惡。合君臣之配偶。而又探索病源。推求經絡。其思遠。其義精。味不過三四。而其用變化不窮。聖人之智。真與天地同體。非人之心思所能及也。上古至今。千聖相傳。無敢失墜。至張仲景先生。復申明用法。設為問難。註明主治之症。其傷寒論。金匱要略。集千聖之大成。以承先而啟後。萬世不能出其範圍。此之謂古方。與內經並垂不朽者。其前後名家。如倉公扁鵲華佗孫思邈諸人。各有師承。而淵源又與仲景微別。然猶自成一家。但不能與靈素本草一線相傳。為宗枝正脉耳。既而積習相仍。每著一書。必自撰方千百。唐時諸公。用藥雖博。已乏化機。至於宋人。并不知藥。其方亦板實膚淺。元時號稱極盛。各立門庭。徒騁私見。迨乎有明。蹈襲元人緒餘而已。今之醫者。動云古方。不知古方之稱。其指不一。若謂上古之方。則自仲景先生流傳以外。無幾也。如謂宋元所製之方。則其可法可傳者。絕少。不合法而荒謬者甚多。豈可奉為典章。若謂自明以前。皆稱古方。則其方不下數百萬。夫常用之藥。不過數百品。而為方數百萬。隨枯幾味。皆已成方。何必定云某方也。嗟嗟古之方。何其嚴。今之方。何其易。其間亦有奇巧之法。用藥之妙。未必不能補古人之所未及。可備參考者。然其大經大法。則萬不能及。其中更有違經背法之方。反足貽害。安得有學之士。為之擇而存之。集其大成。刪其無當。實千古之盛舉。余蓋有志而未遑矣。

單方論

單方者藥不過一二味治不過一二症而其效則甚捷用而不中亦能害人。即世所謂海上方者是也。其原起於本草。蓋古之聖人辨藥物之性則必著其功用。如逐風逐寒解毒定痛之類。凡人所患之症。止一二端。則以一藥治之。藥專則力厚。自有奇效。若病兼數症。則必合數藥而成方。至後世藥品日增。單方日多。有效有不效矣。若夫內外之感。其中自有傳變之道。虛實之殊。久暫之別。深淺之分。及夫人性各殊。天時各異。此非守經達權者不能治。若皆以單方治之。則藥性專而無製偏。而不醇。有利必有害。故醫者不可以此嘗試。此經方之所以為貴也。然參考以廣識見。且為急救之備。或為專攻之法。是亦不可不知者也。

禁方論

天地有好生之德。聖人有大公之心。立方以治病。使天下共知之。豈非天地聖人之至願哉。然而方之有禁。則何也。其故有二。一則懼天下之輕視夫道也。夫經方之治病。視其人學問之高下。以為效驗。故或用之而愈。或用之而反害。變化無定。此大公之法也。若禁方者。表有所不解。機有所莫測。其傳也。往往出於奇人隱士。仙佛鬼神。其遇之也。甚難。則愛護之必至。若輕以授人。必生輕易之心。所以方家往往愛惜此乃人之情也。一則恐發天地之機也。禁方之藥。其製法必奇。其配合必巧。窮陰陽之柄。窺造化之機。其修合必虔誠敬慎。少犯禁忌。則藥無驗。若輕以示人。則氣洩而用不神。此又陰陽之理也。靈樞禁服篇。黃帝謂雷公曰。此先師之所禁。割臂插血之盟也。故黃帝有蘭台之藏。長桑君有無泄之戒。古聖皆然。若夫詭詐之人。專欲圖利。托名禁方。欺世惑眾。更有修煉熱藥。長慾導淫。名為養生。實連其死。此乃江湖惡習。聖人之所必誅也。又有古之禁方。傳之已廣。載入醫書中。與經方並垂。有識者自能擇之也。

古今方劑大小論

今人以古人氣體充實故方劑分兩甚重此無稽之說也自三代至漢晉升斗權衡雖有異同以今較之不過十分之二余親見漢時有六升銅量容今之一升二合如桂枝湯傷寒大劑也桂枝芍藥各三兩甘草二兩共八兩為一劑在令只一兩八錢又分三服則一服不過五錢三分零他方有藥品多者亦不過倍之而已況古時之藥醫者自備俱用鮮者分兩以鮮者為準乾則折算如半夏麥冬之類皆生大而乾小至附子則野生者甚小後人種之乃肥大皆有確証今人每方必十餘味每味三四錢則一劑重二三兩矣更有熟地用至四兩一劑者尤屬可怪古丸藥如烏梅丸每服如桐子大十九丸今秤不過二三分今則用三四錢至七八錢矣古未藥用方寸匕不過今之六七分今服三四錢矣古人用藥分兩未嘗從重周禮遺人凡萬民之食則每日食八升有餘矣蓋一升只二合也二十年來時醫誤聞古方增重分兩此風日熾即使對病元氣不勝藥力亦必有害況更與病相反害不尤速乎既不考古又無師授無怪乎其動成笑柄也

藥誤不即死論

古人治法無一方不對病無一藥不對症如是而病猶不愈此乃病本不可愈非醫之咎也後世醫失其傳病之名亦不能知宜其胸中毫無所主也凡一病有一病之名如中風總名也其類有偏枯痺痺風痺歷節之殊而諸症之中又各有數症各有定名各有主方又如水腫總名也其類有皮水正水石水風水之殊而諸症又各有數症各有定名各有主方凡病盡然醫者必能實指其何名遵古人所主何方加減何藥自有法度可循乃不論何病總以陰虛陽虛等籠統之談概之而試以籠統不切之藥然亦竟有愈者或其病本輕適欲自愈或偶有一二對症之藥亦奏小效皆屬誤治其得免於殺人之名者何也蓋殺人之藥必大毒如砒鴆之類或大熱大寒峻厲之品又適與病相反服後立見其危若尋常之品不過不能愈病或反增他病耳不即死也久而病氣自退正氣自復無不愈者間有遷延日久或隱受其害而死更

或屢換庸醫徧試諸藥久而病氣益深元氣竭亦死。又有初因誤治變成他病輒轉而死。又有始服有小效久服太過反增他病而死。蓋日日診視小效則以為可愈小劇又以為難治並無誤治之形確有誤治之實。病家以為病久不痊自然不起非醫之咎因其不即死而不之罪其實則真殺之而不覺也。若夫誤投峻厲相反之藥服後顯然為害此其殺人。人人能知之矣。惟誤服參附峻厲之藥而即死者則病家之所甘心。必不歸咎於醫。故醫者雖自知其誤必不以此為戒而易其術也。

藥石性同用異論

一藥有一藥之性情功效其藥能治某病古方中用之以治某病此顯而易見者然一藥不止一方用之他方用之亦效何也。蓋藥之功用不止一端在此方則取其此長在彼方則取其彼長真知其功效之實自能曲中病情而得其力。迨至後世一藥所治之病愈多而亦效者蓋古人尚未盡知之。後人屢試而後知所以歷代本草所註藥性較之神農本經所註功用增益數倍蓋以此也。但其中有當有不當不若神農本草字字精切耳。又同一熱藥而附子之熱與乾薑之熱迥乎不同同一寒藥而石膏之寒與黃連之寒迥乎不同一或誤用禍害立至。蓋古人用藥之法並不專取其寒熱溫涼補瀉之性也。或取其氣或取其味或取其色或取其形或取其所生之方或取嗜好之偏其藥似與病情之寒熱溫涼補瀉若不相關而投之反有神效古方中如此者不可枚舉學者必將神農本草字字求其精義之所在而參以仲景諸方則聖人之精理自能洞曉而已之立方亦必有奇思妙想深入病機而天下無難治之症也。

剗劑論

世有奸醫利人之財取效於一時不顧人之生死者謂之剗劑。剗劑者以重藥奪截邪氣也。夫邪之中人不能使之一時即出必漸消漸托而後盡焉。今欲一日見效勢必用猛厲之藥與邪相爭或用峻補之藥。

遏抑邪氣。藥猛厲則邪氣暫伏而正亦傷。藥峻補則正氣驟發而邪內陷。一時似乎有效。及至藥力盡而邪復來。元氣已大壞矣。如病者身熱甚不散其熱。而以沉寒之藥遏之。腹痛甚不求其因而以香燥禦之。瀉痢甚不去其積。而以收斂之藥塞之。之類此峻厲之法也。若邪盛而投以大劑參附。一時陽氣大旺。病氣必潛藏。自然神氣略定。越一二日元氣與邪氣相併。反助邪而肆其毒。為禍尤烈。此峻補之法也。此等害人之術。奸醫以此欺人。而騙財者十之五。庸醫不知而效尤以害人者。亦十之五。為醫者不可不察。病家亦不可不察也。

製藥論

製藥之法古方甚少。而最詳於宋之雷斅。今世所傳雷公炮炙論是也。後世製藥之法日多。一日內中亦有至無理者。固不可從。若其微妙之處。實有精義存焉。凡物氣厚力大者。無有不偏。偏則有利必有害。欲取其利而去其害。則用法以製之。則藥性之偏者。醇者。其製之義又各不同。或以相反為製。或以相資為製。或以相惡為製。或以相畏為製。或以相喜為製。而製法又復不同。或製其形。或製其性。或製其味。或製其質。此皆巧於用藥之法也。古方製藥無多。其立方之法。配合氣性。如桂枝湯中用白芍。亦即有相製之理。故不必每藥製之也。若後世好奇眩異之人。必求貴重怪僻之物。其製法大費工本。以神其說。此乃好奇尚異之人。造作以欺誑富貴人之法。不足憑也。惟平和而有理者。為可從耳。

人參論

天下之害人者。殺其身未必破其家。破其家未必殺其身。先破人之家而後殺其身者。人參也。夫人參用之而當實能補養元氣。拯救危險。然不可謂天下之死人皆能生之也。其為物氣盛而力厚。不論風寒暑濕痰火鬱結。皆能補塞。故病人如果邪去正衰。用之固宜。或邪微而正亦備。或邪深而正氣怯弱。不能逐

之於外則於除邪藥中投之。以為驅邪之助。然又必審其輕重而後用之。自然有扶危定傾之功。乃不察其有邪無邪。是虛是實。又佐以純補溫熱之品。將邪氣盡行補住。輕者邪氣永不復出。重者即死矣。夫醫者之所以遇疾即用。而病家服之。死而無悔者。何也。蓋愚人之心。皆以價貴為良。藥價賤為劣。藥而常人之情。無不好補而惡攻。故服參而死。即使明知其誤。然以為服人參而死。則醫者之力已竭。而人子之心已盡。此命數使然。可以無恨矣。若服攻劑之藥而死。即使使用藥不誤。病實難治。而醫者之罪已不可勝誅矣。故人參者。乃醫家避功避罪之聖藥也。病家如此。醫家如此。而害人無窮矣。更有駭者。或以用人參為冠冕。或以用人參為有力量。又因其貴重。深信以為必能挽回造化。故毅然用之。孰知人參一用。凡病之有邪者。即死。其不死者。亦終身不得愈乎。其破家之故。何也。蓋向日之人參。不過一二換多者。三四換今。則其價十倍。其所服又非一錢二錢而止。小康之家。服二三兩。而家已蕩然矣。夫人情於死生之際。何求不得。寧恤破家乎。醫者全不一念。輕將人參立方。用而不遵。在父為不慈。在子為不孝。在夫婦昆弟。為忍心害理。并有親戚朋友。責罰痛罵。即使明知無益。姑以此塞責。又有孝子慈父。倖其或生。竭力以謀之。遂使貧窶之家。病或稍愈。一家終身凍餒。若仍不救。棺殮俱無。賣妻鬻子。全家覆敗。醫者誤治殺人。可怒而逞己之意。日日害人破家。其惡甚於盜賊。可不慎哉。吾願天下之人。斷不可以人參為起死回生之藥。而必服之。醫者必審其病實係純虛。非參不治。服必萬全。然後用之。又必量其家業。尚可以支持。不至用參之後。元生無靠。然後節自用之一。以惜物力。一以全人之命。一以保人之家。如此存心。自然天降之福。若如近日之醫。殺命破家。於人不知之地。恐天之降禍。亦在人不知之地也。可不慎哉。

用藥如用兵論

聖人之所以全民生也。五穀為養。五果為助。五畜為益。五菜為充。而毒藥則以之攻邪。故雖甘草人參。誤

用致害皆毒藥之類也。古人好服食者，至奇疾猶之好戰勝者，必有奇殃。是故兵之設也，以除暴不得已而後興。藥之設也，以攻疾亦不得已而後用。其道同也。故病之為患也，小則耗精，大則傷命。隱然一敵國也。以草木偏性攻臟腑之偏勝，必能知彼知己。多方以制之，而後無喪身殞命之憂。是故傳經之邪而先奪其未至，則所以斷敵之要道也。橫暴之疾而急保其未病，則所以守我之巖疆也。挾宿食而病者，先除其食，則敵之資糧已焚。合舊疾而發者，必防其併，則敵之內應既絕。辨經絡而無泛用之藥，此之謂向導之師。因寒熱而有反用之方，此之謂行間之術。一病而分治之，則用寡可以勝衆。使前後不相救而勢自衰，數病而合治之，則併力搗其中堅。使離散無所統，而衆來潰。病方進，則不治其太甚，固守元氣，所以老其師。病方衰，則必窮其所之，更益精銳，所以搗其穴。若夫虛邪之體，攻不可過，本和平之藥，而以峻藥補之，衰敵之目，不可窮。民力也。實邪之傷，攻不可緩。用峻厲之藥，而以常藥和之，富強之國，可以振威武也。然而選材必當器械必良，尅期不愆，布陣有方，此又不可更僕數也。孫武子十三篇治病之法，盡之矣。

執方治病論

古人用藥立方，先陳列病症，然後云某方主之。若其症少有出入，則有加減之法，附於方後，可知方中之藥，必與所現之症，纖悉皆合。無一味虛設，乃用此方。毫無通融也。又有一病而云某方亦主之者，其方或稍有異同，或竟不同，可知一病并不止一方所能治。今乃病名稍似，而其中之現症，全然不同，乃立以此方。施治則其藥皆不對症矣。并有病名雖一，病形相反，亦用此方，則其中盡屬相反之藥矣。總之欲用古方，必先審病者所患之症，悉與古方前所陳列之症皆合。更檢方中所用之藥，無一不與所現之症相合。然後施用。否則必須加減，無可加減，則另擇一方。斷不可道聽塗說，聞某方可以治某病，不論其因之異同，症之出入，而冒昧施治。雖所用悉本於古方，而害益大矣。

湯藥不足盡病論

內經治病之法。針灸為本。而佐之以砭石。熨浴。導引。按摩。酒醴等法。病各有宜。缺一不可。蓋服藥之功。入腸胃而氣四達。未嘗不能行於臟腑經絡。若邪在筋骨肌肉之中。則病屬有形。藥之氣味不能奏功也。故必用針灸等法。即從病之所在。調其血氣。逐其風寒。為實而可據也。況即以服藥論。止用湯劑。亦不能盡病。蓋湯者。盪也。其行速。其質輕。其力易過。而不留。惟病在榮衛腸胃者。其效更速。其餘諸病。有宜丸宜散。宜膏者。必醫者豫備。以待一時急用。視其病之所在。而委曲施治。則病無遁形。故天下無難治之症。而所投輒有神效。扁鵲倉公。所謂禁方者是也。若今之醫者。祇以一煎方為治。惟病後調理。則用滋補丸散。盡廢聖人之良法。即使用藥不誤。而與病不相入。則終難取效。故扁鵲云。人之所患。患病多。醫之所患。患道少。近日病變愈多。而醫家之道愈少。此痼疾之所以日多也。

本草古今論

本草之始。昉於神農。藥止三百六十品。此乃開天之聖人。與天地為一體。實能探造化之精。窮萬物之理。字字精確。非若後人推測而知之者。故對症施治。其應若響。仲景諸方之藥。悉本此書。藥品不多。而神明變化。已無病不治矣。迨其後。藥味日多。至陶弘景。倍之而為七百二十品。後世日增一日。凡華夷之奇草。逸品。試而有效。醫家皆取而用之。代有成書。至明季時。珍增益。唐慎微證類本草。為綱目。考其異同。辨其真偽。原其生產。集諸家之說。而本草更大備。此藥味由少而多之故也。至其功用。則亦後人試驗而知之。故其所治之病益廣。然皆不若神農本草之純正。真確。故宋人有云。用神農之品。無不效。而弘景所增。已不甚效。若後世所增之藥。則尤有不足憑者。至其詮釋。大半皆視古方用。此藥醫某病。則增註之。或古方治某病。其藥不止一品。而誤以方中此藥為專治此病者。有之。更有以己意推測而知者。又或偶愈一病。

實非此藥之功而強著其效者種種難信至張潔古李東垣輩以某藥專入某經則更穿鑿矣其詳在治病不必分經絡臟腑論本草必以神農為本而他說則必審擇而從之更必驗之於病而後信又必考古人方中所曾用者乃可採取餘則止可於單方外治之用法用之又有後世所增之奇藥或出於深山窮谷或出於殊方異域前世所未嘗有者後人用之往往有奇效此乃偏方異氣之所鍾造物之機久而愈洩能治古方所不能治之奇病博物君子亦宜識之以廣見聞此又在本草之外者矣

藥性變遷論

古方所用之藥當時效驗顯著而本草載其功用鑿鑿者今依方施用竟有應與不應其故何哉蓋有數端焉一則地氣之殊也當時初用之始必有所產之地此乃其本生之土故氣厚而力全以後傳種他方則地氣移而力薄矣一則種類之異也凡物之種類不一古人所採必至貴之種後世相傳必擇其易於繁衍者而種之未必皆種之至貴者物雖非偽而種則殊矣一則天生與人力之異也當時所採皆生於山谷之中元氣未洩故得氣獨厚今皆人功種植既非山谷之真氣又加灌溉之功則性平淡而薄劣矣一則名實之訛也當時藥不市賣皆醫者自取而備之迨其後有不常用之品後人欲得而用之尋求採訪或誤以他物充之或以別種代之又肆中未備以近似者欺人取利此藥遂失其真矣其變遷之因實非一端藥性既殊即審病極真處方極當奈其藥非當時之藥則效亦不可必矣今之醫者惟知定方其藥則惟病家取之肆中所以真假莫辨雖有神醫不能以假藥治真病也

藥性專長論

藥之治病有可解者有不可解者如性熱能治寒性燥能治濕芳香則通氣滋潤則生津此可解者也如同一發散也而桂枝則散太陽之邪柴胡則散少陽之邪同一滋陰也而麥冬則滋肺之陰生地則滋腎

之陰同一解毒也而雄黃則解蛇蟲之毒甘草則解飲食之毒已有不可盡解者至如鱉甲之消痞塊史君子之殺蛔蟲亦小豆之消膚腫莖仁生服不眠熟服多眠白鷓鴣花之不腐肉而腐骨則尤不可解者此乃藥性之專長即所謂單方秘方也然人止知不可解者之為專長而不知常用藥之中亦各有專長之功後人或不知之而不能用或日用而忽焉皆不能盡收藥之功效者也故醫者當廣集奇方深明藥理然後奇症當前皆有治法變化不窮當年神農者本草之時既不能睹形而即識其性又不可每藥歷試而知竟能深識其功能而所投必效豈非與造化相為默契而非後人思慮之所能及者乎

煎藥法論

煎藥之法最宜深講藥之效不效全在乎此夫烹飪禽魚羊豕失其調度尚能損人況藥專以之治病而可不講乎其法載於古方之末者種種各殊如麻黃湯先煮麻黃去沫然後加餘藥同煎此主藥當先煎之法也而桂枝湯又不必先煎桂枝服藥後須啜熱粥以助藥力又一法也如茯苓桂枝甘草大棗湯則以甘瀾水先煎茯苓如五苓散則以白飲和服服後又當多飲暖水小建中湯則先煎五味去渣而後納飴糖大柴胡湯則煎減半去渣再煎柴胡加龍骨牡蠣湯則煎藥成而後納大黃其煎之多寡或煎水減半或十分煎去二三或止煎一二十沸煎藥之法不可勝數皆各有意義大都發散之藥及芳香之藥不宜多煎取其生而疎盪補益滋膩之藥宜多煎取其熟而停蓄此其總訣也故方藥雖中病而煎法失度其藥必無效蓋病家之常服藥者或尚能依法為之其粗魯貧苦之家安能如法制度所以病難愈也若今之醫者亦不能知之矣况病家乎

服藥法論

病之愈不愈不但方必中病方雖中病而服之不得其法則非特無功而反有害此不可不知也如發散

之劑欲驅風寒出之於外必熱服而煖覆其體令藥氣行於榮衛熱氣周徧按風寒而從汗解若半溫而飲之仍當風坐立或僅寂然安臥則藥留腸胃不能得汗風寒無暗消之理而榮氣反為風藥所傷矣通利之藥欲其化積滯而達之於下也必空腹頓服使藥性鼓動推其垢濁從大便解若與飲食雜投則新舊混雜而藥氣與食物相亂則氣性不專而食積愈頑矣故傷寒論等書服藥之法宜熱宜溫宜涼宜冷宜緩宜急宜多宜少宜早宜晚宜飽宜飢更有宜湯不宜散宜散不宜丸宜膏不宜圓其輕重大小上下表裏治法各有當此皆一定之至理深思其義必有得於心也

醫心備藥論

古之醫者所用之藥皆自備之內經云司氣備物則無遺主矣當時韓康賣藥非賣藥也即治病也韓文公進學解云牛溲馬勃鼓之皮俱收並蓄待用無遺醫師之良也今北方人稱醫者為賣藥先生則醫者之自備藥可知自宋以後漸有寫方不備藥之醫其藥皆取之肆中令則舉世昏然夫賣藥者不知醫猶之可也乃行醫者竟不知藥則藥之是非真偽全然不問醫者與藥不相謀方即不誤而藥之誤多矣又古聖人之治病惟感冒之疾則以煎劑為主餘者皆用丸散為多其丸散有非一時所能合者倘有急迫之疾必須丸散俟丸散合就而人已死矣又有一病止須一丸而愈合藥不可止合一丸若使病家為一人而合一料則一丸之外皆為無用惟醫家合之留待當用者用之不終棄也又有不常用不易得之藥儲之數年難遇一用藥肆之中因無人問則亦不備惟醫者自蓄之乃可待不時之需耳至於外科所用之前方不過通散榮衛耳若護心托毒全賴各種丸散之力其藥皆貴重難得及鍛煉之物修合非一二日之功而所費又大亦不得為一人止合一二丸若外治之圍藥塗藥耳藥降藥護肌膚肉止血行癩定痛致痒提膿呼毒生肉生皮續筋連骨又有薰蒸烙灸吊洗點漏等藥種種各異更復每症不同皆非

一時所能備尤必須平時豫合。乃今之醫者既不知其方亦不講其法又無資本以蓄藥料偶遇一大症內科則一煎方之外更無別方外科則膏藥之外更無餘藥即有之亦惟取極賤極易得之一二味以為應酬之具則安能使極危極險極奇極惡之症令起死回生乎故藥者醫家不可不全備者也

乩方論

世有書符請仙而求方者其所書之方固有極淺極陋極不典而不能治病且誤人者亦有極高極古極奇極穩以之治病而神效者其仙或托名呂純陽或托名張仲景其方亦宛然純陽仲景之遺法此其事甚奇然亦有理焉夫乩者機也人心之感召無所不通既誠心於求治則必又能治病之鬼神應之雖非真純陽仲景必先世之明於醫理不遇於時而死者其精靈一時不散遊行於天地之間因感而至以顯其能而其人病適當愈則獲遇之此亦有其理也其方未必盡效然皆必有意義反不若世之時醫用相反之藥以害人惟決死生之處不肯鑿鑿言之此則天機不輕洩之故也至於不通不典之方則必持此之術不工或病家之心不誠非真乩方也

熱藥誤人最烈論

凡藥之誤人雖不中病非與病相反者不能殺人即與病相反藥性平和者不能殺人與病相反性又不平和而用藥甚輕不能殺人性既相反藥劑又重其方中有幾味中病者或有幾味能解此藥性者亦不能殺人兼此數害或其人病甚輕或其人精力壯盛亦不能殺人蓋誤藥殺人如此之難也所以世之醫者大半皆誤亦不見其日殺數人也即使殺之乃輾轉因循以至於死死者不覺也其有幸而不死或漸自愈者反指所誤用之藥以為此方之功效又轉以之誤治他人矣所以終身誤人而不自知其咎也惟大熱大燥之藥則殺人為最烈蓋熱性之藥往往有毒又陽性急暴一入臟腑則血湧氣升若其人之陰

氣本虛。或當天時酷暑。或其人傷暑傷熱。一投熱劑。而火相爭。自亦便閉。舌燥齒乾。口渴心煩。肌裂神躁。種種惡候。一時俱發。醫者及病家俱不察。或云更宜引火歸元。或云此是陰症。當加重其熱藥。而佐以大補之品。其人七竅皆血。呼號宛轉。狀如服毒。而死病家全不以為咎。醫者亦洋洋自得。以為病勢當然。總之。愚人喜服補藥。雖死不悔。我目中所見不一。垂涕泣而道之。而醫者與病家無一能聽從者。豈非所謂命哉。夫大寒之藥。亦能殺人。其勢必緩。猶為可救。不若大熱之藥。斷斷不可救也。至於極輕淡之藥。誤用亦能殺人。此乃其人之本領甚薄。或勢已危殆。故小誤即能生變。此又不可全歸咎於醫殺之也。

薄貼論

今所用之膏藥。古人謂之薄貼。其用大端有二。一以治表。一以治裏。治表者。如呼膿去腐。止痛生肌。并抵風護肉之類。其膏宜輕薄。而日換。此理人所易知。治裏者。或驅風寒。或和氣血。或消痰痞。或壯筋骨。其方甚多。藥亦隨病加減。其膏宜重厚。而久貼。此理人所難知也。蓋人之疾病。由外以入內。其流行於經絡。臟腑者。必服藥乃能驅之。若其病既有定所。在於皮膚筋骨之間。可按而得者。用膏貼之。閉塞其氣。使藥性從毛孔而入。其腠理通經貫絡。或提而出之。或攻而散之。較之服藥尤有力。此至妙之法也。故凡病之氣聚血結。而有形者。薄貼之法為良。但製膏之法。取藥必真心志。必誠火候。必到方能有效。否則不能奏功。至於敷熨吊漏種種雜法。表亦相同。在善醫者通變之而已。

貌似古方欺人論

古聖人之立方。不過四五味而止。其審藥性至精。至當。其察病情至真。至確。方中所用之藥。必準對其病。而無毫髮之差。無一味泛用之藥。且能以一藥兼治數症。故其藥味雖少。而無症不該。後世之人。果能審其人之病。與古方所治之病無少異。則全用古方治之。無不立效。其如天下之風氣各殊。人之氣稟各異。

則不得不依古人所製主病之方。略為增減則藥味增矣。又或病同而症甚雜。未免欲兼顧則隨症增一二味。而藥又增矣。故後世之方。藥味增多。非其好為雜亂也。乃學不如古人。不能以一藥該數症。故變簡而為繁耳。此猶不失周詳之意。且古方之設。原有加減之法。病症雜出。亦有多品之劑。藥味至十餘種。自唐以後之方。用藥漸多。皆此義也。乃近世之醫。動云效法漢方。藥止四五味。其四五味之藥。有用浮泛輕淡之品者。雖不中病。猶無大害。若趨時之輩。竟以人參附子。乾薑蒼朮。鹿茸熟地等峻補辛熱之品。不論傷寒暑濕。惟此數種輪流轉換。以成一方。種種與病相反。每試必殺人。毫不自悔。既不辨病。又不審藥性。更不記方書。以為此乃漢人之法。嗚呼。今之所學。漢人之方。向其害人如此之毒也。其端起於近日之時。醫好為高論。以欺人。又人情樂於溫補而富貴之家尤甚。不如是則道不行。所以人爭效尤。以致貽害不。息。安有讀書考古深思體驗之君子。出而挽回之。亦世道生民之大幸也。

醫學源流論下卷目錄

治法

司天運氣論

病隨國運論

出奇制病論

發汗不用燥藥論

攻補寒熱同用論

病深非淺藥能治論

防微論

輕藥愈病論

書論附科

難經論

脈經論

太素脈論

幼科論

古今

四大家論

醫學源流論

卷下目錄

醫道通治道論

針灸失傳論

治病緩急論

病不可輕汗論

臨病人問所便論

愈病有日期論

知病必先知症論

腹內癰論

傷寒論

千金外臺論

婦科論

瘍科論

五方異治論

水病針法論

治病分合論

傷風難治論

治病不必顧忌論

治病必考其驗否論

補藥可通融論

圍藥論

金匱論

活人書論

痘科論附種痘說

祝由科論

醫家論

醫學淵源論

考試醫學論

邪說陷溺論

醫者誤人無罪論

醫非人人可學論

涉獵醫書誤人論

名醫不可為論

病家論

醫學源流論卷下

吳江徐靈胎洄溪著

司天運氣論

邪說之外。有欺人之學。有耳食之學。何謂欺人之學。好為高談奇論。以駭人聽聞。或勸襲前人之語。以示淵博。彼亦自知其為全然不解。但量他人亦莫之能深考也。此為欺人之學。何謂耳食之學。或竊聽他人之說。或偶聞先古之書。略記數語。自信為己得其秘。大言不慚。以此動眾。所謂道聽塗說是也。如近人所談。司天運氣之類是也。彼所謂司天運氣者。以為何氣司天。則是年民當何病。假如厥陰司天。風氣主之。則是年之病皆當作風治。此等議論。所謂耳食也。蓋司天運氣之說。黃帝不過言天人相應之理。如此其應驗。先候于脈。凡遇少陰司天。則兩手寸口不應。厥陰司天。則右寸不應。太陰司天。則左寸不應。若在泉。則尺脈不應。亦如之。若脈不當其位。則病相反者。死。此診脈之一法也。至于病。則必觀是年歲氣勝與不勝。如厥陰司天。風淫所勝。民病心痛。脇滿等症。倘是年風淫雖勝。而民另生他病。則不得亦指為風淫之病也。若是年風淫不勝。則又不當從風治矣。經又云。相火之下。水氣乘之。水位之下。火氣承之。五氣之勝。皆然。此乃亢則害。承乃制之理。即使果勝。亦有相制者乘之。更與司天之氣相反矣。又云。初氣終三氣。天氣主之。勝之常也。四氣盡終。氣地氣主之。復之常也。有勝則復。無勝則否。則歲半以前。屬司天。歲半以後。又屬在泉。其中又有勝不勝之殊。其病更無定矣。又云。厥陰司天。左少陰。右太陽。謂之左間。右間。六氣皆有左右間。每間主六十日。是一歲之中。復有六氣循環作主矣。其外又有南政北政之反。其位。天符。歲會。三合之不齊。太過不及之異。氣欲辨。明分晰。終年不能盡其繡。當時聖人。不過言天地之氣。運行旋轉如此耳。至于人之得病。則豈能一一與之盡合。一歲之中。不許有一人生他病乎。故內經治歲氣勝復。亦不

分所以得病之因總之見病治病如風淫于內則治以辛涼六氣皆有簡便易守之法又云治諸勝復寒者熱之熱者寒之溫者清之清者溫之無問其數以平為期何等劃一凡運氣之道言其深者聖人有所不能知及施之實用則平正通達人人易曉但不若今之醫者所云何氣司天則生何病正與內經圓機活法相背耳

醫道通治道論

治身猶治天下也天下之亂有由乎天者有由乎人者由乎天者如夏商水旱之災是也由乎人者如歷代季世之變是也而人之病有由乎先天者有由乎後天者由乎先天者其人生而虛弱柔脆是也由乎後天者六淫之害七情之感是也先天之病非其人之善養與服大藥不能免於夭折猶之天生之亂非大聖大賢不能平也後天之病乃風寒暑溼燥火之疾所謂外患也喜怒憂思悲驚恐之害所謂內憂也治外患者以攻勝四郊不靖而邊將出師速驅除之可也臨辟雍而講禮樂則敵在門矣故邪氣未盡而輕用補者使邪氣內入而亡治內傷者以養勝綱紀不正而崇儒講道徐化導之可也若任刑罰而嚴誅戮則禍益深矣故正氣不足而輕用攻者使其正氣消盡而亡然而大盛之世不無玩民故刑罰不廢則補中之攻也然使以小寇而遽起戎兵是擾民矣故補中之攻不可過也征誅之年亦修內政故教養不弛則攻中之補也然以戎首而稍存姑息則養寇矣故攻中之補不可誤也天下大事以天下全力為之則事不墮天下小事以一人從容處之則事不擾患大病以大藥制之則病氣無餘患小病以小方處之則正氣不傷然而施治有時先後有序大小有方輕重有度疏密有數純而不雜整而不亂所用之藥各得其性則器使之道所處之方各得其理則調度之法能即小以喻大誰謂良醫之法不可通於良相也

五方異治論

人稟天地之氣以生。故其氣體隨地不同。西北之人氣深而厚。凡受風寒。難于透出。宜用疏通重劑。東南之人氣浮而薄。凡遇風寒。易于疏散。宜用疏通輕劑。又西北地寒。當用溫熱之藥。然或有邪蘊于中。而內反甚熱。則用辛寒為宜。東南地溫。當用清涼之品。然或有氣隨邪散。則易于亡陽。又當用辛溫為宜。至交廣之地。則汗出無度。亡陽尤易。附桂為常用之品。若中州之卑濕。山陝之高燥。皆當隨地制宜。故入其境。必問水土風俗。而細調之。不但各府各別。即一縣之中。風氣亦有迥殊者。并有所產之物。所出之泉。皆能致病。土人皆有極效之方。皆宜詳審訪察。若恃己之能。執己之見。治竟無功。反為土人所笑矣。

湖州長興縣。有合溪小兒。飲此水。則腹中生痞。土人治法。用線掛頸。以兩頭按乳頭上。剪斷。即將此線掛轉。將兩頭向背脊上一併拽齊。線頭盡處。將黑點記脊上。用艾灸之。或三壯。或七壯。即消。永不復發。服藥無效。

病隨國運論

天地之氣運數百年一更易。而國家之氣運亦應之。上古無論。即以近代言。如宋之末造。中原失陷。主弱臣弛。張潔。李季。東垣輩。立方皆以補中宮。健脾胃。用剛燥扶陽之藥為主。局方亦然。至于明季。主暗臣專。膏澤不下於民。故丹溪以下諸醫。皆以補陰益下為主。至我

本朝運當極隆之會。

聖聖相承。大

權獨攬。朝綱整肅。惠澤旁流。此陽盛于上之明徵也。又冠飾朱纓。口燔烟草。五行惟火。獨旺。故其為病皆屬盛陽上越之症。數十年前。雲間老醫。知此義者。往往專以苓連知柏。挽回誤投溫補之人。應手奇效。此實與運氣相符。近人不知此理。非惟不能隨症施治。并執甯過溫熱。毋過寒冷之說。偏於溫熱。又多矯枉過正之論。如中暑一症。或有伏陰在內者。當用大順散。理中湯。此乃千中之一。今則不論何人。凡屬中暑。皆用理中。等湯。我目覩七竅皆裂而死者。不可勝數。至于託言祖述。東垣用蒼朮等燥藥者。舉國皆然。此

等惡習皆由不知天時國運之理誤引舊說以害人也故古人云不知天地人者不可以為醫

針灸失傳論

靈素兩經其詳論藏府經穴疾病等說為針法言者十之七八為方藥言者十之二三上古之重針法如此然針道難而方藥易病者亦樂于服藥而苦于針所以後世方藥盛行而針法不講今之為針者其顯然之失有十而精微尚不與焉兩經所言十二經之出入起止淺深左右交錯不齊其穴隨經上下亦參差無定令人祇執同身寸依左右一直豎量並不依經曲折則經非經而穴非穴此一失也兩經治病云某病取某穴者固多其餘則指經而不指穴如靈終始篇云人迎一盛寫足少陽補足太陰厥病篇云厥頭痛或取足陽明太陰或取手少陽足少陰耳聾取手陽明噎乾取足少陰皆不言某穴其中又有瀉子補母等義今則每病指定幾穴此二失也兩經論治并營輸經合最重又刺井春刺營夏刺輸長夏刺經秋刺合凡只言某經而不言某穴者大都皆指并營五者為言今則皆不講矣此三失也補瀉之法內經云吸則內針無令氣忤靜以久留無令邪布吸則轉針以得氣為故候呼引針呼盡乃去大氣皆出為瀉呼盡內針靜以久留以氣至為故候吸引針氣不得出各在其處推闔其門令神氣存大氣留止為補又必迎其經氣疾內而徐出不按其痛為瀉隨其經氣徐內而疾出即按其痛為補其法多端今則轉針之時以大指推出為瀉搓人為補此四失也納針之後必候其氣刺實者陰氣隆至乃去針刺虛者陽氣隆至乃出針氣不至無問其數氣至即去之勿復針難經云先以左手壓按所針之處彈而努之爪而下之其氣來如動脈之狀順而刺之得氣因而推內之是謂補動而伸之是謂瀉今則時時轉動俟針下寬轉而後出針不問氣之至與不至此五失也凡針之深淺隨時不同春氣在毛夏氣在皮膚秋氣在肌肉冬氣在筋骨故春夏刺淺秋冬刺深反此有害今則不論四時分寸各有定數此六失也古之用針凡瘧疾

傷寒寒熱咳嗽一切藏府七竅等病無所不治。今則止治經脈形體痿痺屈伸等病而已。此七失也。古人刺法取血甚多。靈樞血絡論言之最詳。而頭痛腰痛尤必大寫其血。凡血絡有邪者必盡去之。若血射出而黑必令變色。見赤血而止。否則病不除而反有害。令人則偶爾見血病者醫者已惶矣。據病何由除。此八失也。內經刺法有九變十二節。九變者輸刺遠道刺經刺絡刺分刺大寫刺毛刺巨刺焮刺十二節者。偶刺報刺收刺齊刺揚刺直針刺刺輸刺短刺浮刺陰刺傍刺贊刺以上二十一法。視病所宜不可更易。一法不備則一病不愈。今則祇直刺一法。此九失也。古之針制有九。鑿針員針鍤針鈹針鈿針員針針毫針長針大針亦隨病所宜而用。一失其制則病不應。今則大者如員針小者如毫針而已。豈能治痼疾暴氣。此十失也。其大端之失已如此。而其尤要者更在神志專一。手法精嚴。經云神在秋毫屬音病者審視血脈刺之無殆。又云經氣已至慎守勿失。深淺在志。遠近若一。如臨深淵。手如握虎。神無營于眾物。又云伏如橫弩。起如發機。其專精敏妙如此。今之醫者隨手下針。漫不經意。即使針法如古。志不凝而機不達。猶恐無效。況乎全與古法相背乎。其外更有先後之序。迎隨之異。貴賤之殊。勞逸之分。肥瘦之度。多少之數。更僕難窮。果能潛心體察。以合聖度。必有神功。其如人之畏難就易。盡違古法。所以世之視針甚輕。而其術亦不甚行也。若灸之一法。則較之針所治之病。不過十之一二。知針之理。則灸又易易耳。

水病針法論

凡刺之法。不過補瀉經絡祛邪納氣而已。其取穴甚少。惟水病風水。皮膚脹必刺五十七穴。又云皮膚之血盡取之。何也。蓋水旺必尅脾土。脾土衰則偏身皮肉皆腫。不特一經之中有水氣矣。若僅刺一經。則一經所過之地。水自漸消。而他經之水不消。則四面會聚。并一經已瀉之水。亦仍滿矣。故必周身腫滿之處皆刺而瀉之。然後其水不復聚耳。此五十七穴者。皆藏之經絡水之所客也。此與大禹治洪水之法同。蓋洪

水泛溢必有江淮河濟各引其所近之眾流以入海。必不能使天下之水祇歸一河以入海也。又出水之後更必調其飲食。經云方飲無食。方食無飲。欲使飲食異居則水不從食。無食他食百三十五日。此症之難愈如此。余往時治此病。輕者多愈。重者必復腫。蓋由五十七穴未能全刺而病人亦不能守戒一百三十五日也。此等大症少違法度即無愈理可不慎哉。

出奇制病論

病有經有緯。有常有變。有純有雜。有正有反。有整有亂。并有從古醫書所無之病。歷來無治法者。而其病又實可愈。既無陳法可守。是必熟尋內經難經等書。審其經絡藏府受病之處。及七情六氣相感之因。與夫內外分合。氣血聚散之形。必有鑿鑿可徵者。而後立為治法。或先或後。或併或分。或上或下。或前或後。取藥極當。立方極正。而寓以巧思奇法。深入病機。不使扞格。如庖丁之解牛。雖筋骨關節之間。亦游刃有餘。然後天下之病。千緒萬端。而我之設法。亦千變萬化。全在乎時。于極難極險之處。參悟通澈。而後能臨事不眩。否則一遇疑難。即束手無措。冒昧施治。動輒得咎。誤人不少矣。

治病緩急論

病有當急治者。有不當急治者。外感之邪。猛悍劇疾。內犯藏府。則元氣受傷。無以托疾于外。必乘其方起之時。邪入尚淺。與氣血不相亂。急驅而出之于外。則易而且速。若俟邪氣已深。與氣血相亂。然後施治。則元氣大傷。此當急治者也。若夫病機未定。無所歸著。急用峻攻。則邪氣益橫。如人之傷食。方在胃中。則必先化食之藥。使其食漸消。由中焦而達下焦。變成渣穢而出。自然漸愈。若即以硝黃峻藥下之。則食尚在。上焦即使隨藥而下。乃皆未化之物。腸胃中脂膜與之全下。而人已大疲。病必生變。此不當急治者也。以此類推。餘病可知。至于虛人與老少之疾。尤宜分別調護。使其元氣漸轉。則正復而邪退。醫者不明此。

理而求速效則補其所不當補攻其所不當攻所服之藥不驗又轉求他法無非誅伐無過至當愈之時
其人己為藥所傷而不能與天地之生氣相應矣故雖有良藥用之非時反能致害緩急之理可不講哉
治病分合論

一病而當分治者如痢疾腹痛脹滿則或先治脹滿或先治腹痛即脹滿之中亦不同或因食或因氣或
先治食或先治氣腹痛之中亦不同或因積或因寒或先去積或先散寒種種不同皆當視其輕重而審
察之以此類推則分治之法可知矣有當合治者如寒熱腹痛頭眩泄瀉厥冒胸滿內外上下無一不病
則當求其因而起先于諸症中擇最甚者為主而其餘症每症加專治之藥一二味以成方則一劑而
諸症皆備以此類推則合治之法可知矣藥亦有分合焉有一病而合數藥以治之者聞古聖人製方之
法自知有數病而一藥治之者聞本草之主治自知為醫者無一病不窮究其因無一方不洞悉其理無
一藥不精通其性庶幾可以自信而不枉殺人矣

發汗不用燥藥論

驅邪之法惟發表攻裏二端而已發表所以開其毛孔令邪從汗出也當用至輕至淡芳香清冽之品使
邪氣緩緩從皮毛透出無犯中焦無傷津液仲景麻黃桂枝等湯是也然猶恐其藥中陰氣為風火所煽
而銷耗於內不能滋潤和澤以托邪於外於是又啜薄粥以助胃氣以益津液此服桂枝湯之良法凡發
汗之方皆可類推汗之必資於津液如此後世不知凡用發汗之方每專用厚朴葛根羌活白芷蒼朮豆
蔻等溫燥之藥即使其人津液不虧內既為風火所熬又復為燥藥所燥則汗從何生汗不能生則邪無
所附而出不但不出邪氣反為燥藥鼓動益復橫肆與正氣相亂邪火四布津液益傷而舌焦唇乾便閉
目赤種種火象自生則身愈熱神漸昏惡症百出若再發汗則陽火盛極動其真陰腎水來救元陽從之

大汗上洩亡陽之危症生矣。輕者亦成痙症。逆屬壞病難治。故用燥藥發汗而殺人者。不知凡幾也。此其端。關於李東垣其所著書。立方皆治溼邪之法。與傷寒雜感無涉。而後人宗其說。以治一切外感之症。其害至令益甚。況治溼邪之法。亦以淡滲為主。如豬苓五苓之類。亦無以燥勝之者。蓋溼亦外感之邪。總宜驅之外出。而兼以燥濕之品。斷不可專用勝濕之藥。使之內攻。致邪與正爭。而傷元氣也。至於中寒之証。亦先以發表為主。無竟用熱藥。以勝寒之理。必其寒氣乘虛陷入。而無出路。然後以薑附回其陽。此仲景用理中之法也。今乃以燥藥發雜感之汗。不但非古聖之法。并誤用東垣之法。醫道失傳。只此淺近之理。尚不知何況深微者乎。

病不可輕汗論

治病之法不外汗下二端而已。下之害人其危立見。故醫者病者皆不敢輕投。至于汗多亡陽而死者十有三。雖死而人不覺也。何則。凡人患風寒之疾。必相戒以為甯暖無涼。病者亦重加覆護。醫者亦云服藥必須汗出而解。故病人之求得汗人。以為當然也。秋冬之時。過暖尚無大害。至於盛夏初秋。天時暑燥。衛氣開而易洩。更加開戶重衾。復投發散之劑。必至大汗不止而陽亡矣。又外感之疾。汗未出之時。必煩悶亞熱。及汗大出之後。衛氣盡洩。必陽衰而畏寒。始之暖覆。猶屬勉強。至此時。雖欲不覆而不能。愈覆愈汗。愈汗愈寒。直至汗出如油。手足厥冷。而病不可為矣。其死也。神氣甚清。亦無痛苦。病者醫者及旁觀之人。皆不解其何故而忽死。惟有相顧墨然而已。我見甚多。不可不察也。總之有病之人。不可過涼。亦不宜太暖。無事不可令汗出。惟服藥之時。宜令小汗。仲景服桂枝湯法。云服湯已。溫覆令微似汗。不可如水淋漓。此其法也。至於亡陽未劇。尤可挽回。傷寒論中。真武理中四逆等法。可考。若已脫盡。無可補救矣。又盛暑之時。病者或居樓上。或臥近竈之所。無病之人。一立其處。汗出如雨。患病者必至時時出汗。即不亡

陽亦必陰竭而死雖無移徙之處必擇一席稍涼之地而處之否則神丹不救也

傷風難治論

凡入偶感風寒頭痛發熱咳嗽涕出俗語謂之傷風非傷寒論中所云之傷風乃時行之雜感也人皆忽之不知此乃至難治之疾生死之所關也蓋傷風之疾由皮毛以入於肺肺為嬌藏寒熱皆所不宜太寒則邪氣凝而不出太熱則火燦金而動血太潤則生痰飲太燥則耗精液太洩則汗出而陽虛太澀則氣閉而邪結并有視為微疾不避風寒不慎飲食經年累月病機日深或成血証或成肺痿或成哮喘或成怯弱比比皆然誤治之害不可勝數諺云傷風不醒變成勞至言也然則治之何如一驅風蘇葉荊芥之類二消痰半夏象貝之類三降氣蘇子前胡之類四和榮衛桂枝白芍之類五潤津液粳仁元參之類六養血當歸阿膠之類七清火黃芩山支之類八理肺桑皮大力子之類八者隨其症之輕重而加減之更加以避風寒戒辛酸則庶幾漸愈否則必成大病醫者又加以升提辛燥之品如桔梗乾薑之類不效即加以酸收如五味子之類則必見血既見血隨用熟地麥冬以實其肺即成勞而死四十年以來我見以千計矣傷哉

攻補寒熱同用論

虛症宜補實症宜瀉盡人而知之者然或人虛而症實如弱體之人冒風傷食之類或人實而症虛如強壯之人勞倦亡陽之類或有人本不虛而邪深難出又有人已極虛而外邪尚伏種種不同若純用補則邪氣益固純用攻則正氣隨脫此病未愈彼病益深古方所以有攻補同用之法疑之者曰兩藥異性一水同煎使其相制則攻者不攻補者不補不如勿服若或兩藥不相制分途而往則或反補其所當攻攻其所當補則不惟無益而反有害是不可不慮也此正不然蓋藥之性各盡其能攻者必攻強補者必補

弱猶掘坎於地水從高處流下必先盈坎而後進必不反向高處流也如大黃與人參同用大黃自能逐去堅積決不反傷正氣人參自能充益正氣決不反補邪氣蓋古人製方之法分經別藏有神明之道焉如瘧疾之小柴胡湯瘧之寒熱往來乃邪在少陽木邪侮土中宮無主故寒熱無定於是用柴胡以驅少陽之邪柴胡必不犯脾胃用人參以健中宮之氣人參必不入肝胆則少陽之邪自去而中土之氣自旺二藥各歸本經也如桂枝湯桂枝走衛以祛風白芍走榮以止汗亦各歸本經也以此而推無不盡然試以神農本草諸藥主治之說細求之自無不得矣凡寒熱兼用之法亦同此義故天下無難治之症後世醫者不明此理藥惟一途若遇病情稍異非顧此失彼即游移泛濫無往而非棘手之病矣但此必本於古人製方成法而神明之若竟私心自用攻補寒熱雜亂不倫是又殺人之術也

臨病人問所便論

病者之愛惡苦樂即病情虛實寒熱之徵醫者望色切脈而知之不如其自言之為尤真也惟病者不能言之處即言而不知其所以然之故則賴醫者推求其理耳今乃病者所自知之病明明為醫者言之則醫者正可因其言而知其病之所在以治之乃不以病人自知之真對症施治反執己之偏見強制病人未有不誤人者如傷寒論中云能食者為中風不能食者為中寒則傷寒內中風之症未嘗禁其食也乃醫者見為傷寒之症斷不許食凡屬感症皆不許其食甚有病已半愈胃虛求食而亦禁之以至因餓而死者又傷寒論云欲飲水者稍稍與之蓋實火煩渴得水則解未嘗禁冷水也乃醫家凡遇欲冷飲之心一概禁止并有伏暑之病得西瓜而即愈者病人哀求欲食亦斷絕不與至煩渴而死如此之類不可枚舉蓋病者之性情氣體有能受溫熱者有能受寒涼者有不受補者有不禁攻者各有不同乃必強而從我意見况醫者之意見亦各人不同於是治病之法無一中肯者矣內經云臨病人問所便蓋病人之所

便即病情真實之所在如身大熱而反欲熱飲則假熱而真寒也身寒戰而反欲寒飲是假寒而真熱也以此類推百不失一而世之醫者偏欲與病人相背何也惟病人有所嗜好而與病相害者則醫者宜開導之如其人本喜酸或得嗽症則酸宜忌如病人本喜酒得溼病則酒宜忌之類此則不可縱欲以益其疾若與病症無碍而病人之所喜則從病人之便即所以治其病也此內經辨症之精義也

治病不必顧忌論

凡病人或體虛而患實邪或舊有他病與新病相反或一人兼患二病其因又相反或內外上下各有所病醫者躊躇束手不敢下藥此乃不知古人制方之道者也古人用藥惟病是求藥所以治病有一病則有一藥以制之其人有是病則其藥當至于病所而驅其邪決不反至無病之處以為禍也若留其病不使去雖強壯之人遷延日久亦必精神耗竭而死此理甚易明也如怯弱之人本無攻伐之理若或傷寒而邪入陽明則仍用硝黃下藥邪去而精氣自復如或懷妊之婦忽患癰癥必用桃仁大黃以下其癰癥而去而胎自安或老年及久病之人或宜發散或宜攻伐皆不可因其血氣之衰而兼用補益如傷寒之後食復女勞復仲景皆治其食清其火並不因病後而用溫補惟視病之所在而攻之中病即止不復有所顧慮故天下無棘手之病惟不能中病或偏或誤或太過則不病之處亦傷而人危矣俗所謂有病病當之此歷古相傳之法也故醫者當疑難之際多所顧忌不敢對症用藥者皆視病不明辨症不的審方不真不知古聖之精義者也

病深非淺藥能治論

天下有治法不誤而始終無效者此乃病氣深痼非泛然之方藥所能愈也凡病在皮毛榮衛之間即使病勢極重而所感之位甚淺邪氣易出至于藏府筋骨之痼疾如勞怯痞隔風痺痿厥之類其感非一日

其邪在藏府筋骨如油之入麵與正氣相併病家不知屢易醫家醫者見其不效雜藥亂投病日深而元氣日敗遂至不救不知此病非一二尋常之方所能愈也今之集方書者如風痺大症之類前錄古方數首後附以通治之方數首如此而已此等治法豈有愈期必當備考此病之種類與夫致病之根源及變遷之情狀并詢其歷來服藥之誤否然後廣求古今以來治此症之方選擇其內外種種治法次第施之又時時消息其效否而神明變通之則痼疾或有可愈之理若徒執數身通治之方屢試不效其計遂窮未有不誤者也故治大症必學問深博心思精敏之專心久治乃能奏效世又有極重極久之病諸藥罔效忽服極輕淡之方而愈此乃其病本有專治之方從前皆係誤治忽遇對症之藥自然應手而痊也

愈病有日期論

治病之法自當欲其速愈世之論者皆以為治早而藥中病則愈速治緩而藥不中病則愈遲此常理也然亦有不論治之遲早而愈期有一定者內經藏氣法時論云夫邪氣之客于身也以勝相加至其所生而愈至其所不勝而甚至其所生而持自得其位而起其他言病愈之期不一傷寒論云發于陽者七日愈發于陰者六日愈又云風家表解而不了了者十二日愈此皆宜靜養調攝以待之不可亂投藥石若以其不愈或多方以取效或更用重劑以希功即使不誤藥力勝而元氣反傷更或有不對症之藥不惟無益反有大害此所宜知也況本原之病必待其精神漸復精神豈有驟長之理至於外科則起發成膿生肌收口亦如痘症有一定之日期治之而誤固有遷延生變者若欲強之有速效則如握苗助長其言有不可勝言者乃病家醫家皆不知之醫者投藥不效自疑為未當又以別方試之不知前方實無所害特時未至耳乃反誤試諸藥愈換而病愈重病家以醫者久而不效更換他醫徧問朋友知其不效亦復更換他藥愈治愈遠由是斷斷不死之病亦不救矣此皆由不知病愈有日期之故也夫病家不足

責為醫者豈可不知而輕以人嘗試乎。若醫者審知之而病家必責我以近效。則當明告之。故決定所愈之期。倘或不信。必欲醫者另立良方。則以和平輕淡之藥。姑以應病者之求。待其自愈。如更不信。則力辭之。斷不可徇人情。而至于誤人。如此則病家一時或反怨謗。以後其言果驗。則亦知我識高而品崇矣。

治人必考其驗否論

天下之事。惟以口舌爭而無從考其信否者。則是非難定。若夫醫。則有效驗之可徵。知之最易。而為醫者。自審其工拙。亦最易。然而世之擇醫者。與為醫者。皆憤憤而莫之辨何也。古人用藥。苟非宿病痼疾。其效甚速。內經云。一劑知。二劑已。又云。覆杯而臥。傷寒論云。一服愈者。不必盡劑。可見古人審病精。而用藥當。未有不二劑而效者。故治病之法。必宜先立醫案。指為何病。所本何方。方中用某藥。專治某症。其論說本之何書。服此藥後。于何時減去。所患之何病。倘或不驗。必求所以不驗之故。而更思必效之法。或所期之效。不應反有他效。必求其所以致他效之故。又或反增他症。或病反重。則必求所以致害之故。而自痛懲焉。更復博考醫書。期于必愈而止。若其病本不能速效。或其病祇可小效。或竟不可治。亦必豫立醫案。明著其說。然後立方。不得冒昧施治。如此自考。自然有過必知。加以潛心好學。其道日進矣。今之醫者。事反此。惟記方數。擇時尚之藥。數種。不論何病何症。總以此塞責。偶爾得效。自以為功。其或無效。或至于死。亦諉于病勢之常。病家亦相循為固。然全不一怪問。有病家于未服藥之前。問醫者服此藥之後。效驗若何。醫者答云。且看服後何如。豈有預期之理。病家亦唯唯自以為失言。何其愚也。若醫者能以此法自考。必成良醫。病家以此法考醫者。必不為庸醫之所誤。兩有所益也。

防微論

病之始生。淺則易治。久而深入。則難治。內經云。聖人不治已病。治未病。夫病已成而藥之。譬猶渴而穿井。

聞而鑄兵不亦晚乎。傷寒論序云時氣不和便當早言其邪由及在腠理以時治之罕有不愈。患人忍之數日乃說邪氣入臟則難可制。昔扁鵲見齊桓公云病在腠理三見之後則已入臟不可治療而逃矣。歷聖相傳如同轡蓋病之始入風寒既淺氣血藏府未傷自然治之甚易。至于邪氣深入則邪氣與正氣相亂欲攻邪則碍正欲扶正則助邪即使邪漸去而正氣已不支矣。若夫得病之後更或勞動感風傷氣傷食謂之病後加病尤極危殆所以人之患病在客館道途得者往往難治非所得之病獨重也。乃既病之後不能如在家之安適而及早治之又復勞動感冒致病深入而難治也。故凡人少有不適必當即時調治斷不可忽為小病以致漸深更不可勉強支持使病更增以貽無窮之害。此則凡人所當深省而醫者亦必詢明其得病之故更加意體察也。

知病必先知症論

凡一病必有數症有病同症異者有症同病異者有症與病相因者有症與病不相因者蓋合之則曰病分之則曰症古方以一藥治一症合數症而成病即合數藥而成方其中亦有以一藥治幾症者有合幾藥而治一症者又有同此一症因不同用藥亦異變化無窮其淺近易知者如吐逆用黃連半夏不寐用棗仁茯神之類人皆知之至于零雜之症如內經所載喘噎噫語吞欠噎嘔笑泣目瞑嗑乾心懸善恐涎下涕出齧脣齧舌善忘善怒善握多夢嘔酸魄汗等症不可勝計或由司天運氣或由藏府生尅或由邪氣傳變內經言之最詳後之醫者病之總名亦不能知安能于一病之中辨明眾症之淵源即使病者身受其苦備細言之而彼實茫然不知古人以何藥為治仍以泛常不切之品應命并有相反之藥以益其疾者此病者之所以無門可告也。學醫者當熟讀內經每症究其緣由詳其情狀辨其異同審其真偽然後備考方書本草詳求古人治法一遇其症應手輒愈不知者以為神奇其實古聖皆有成法也。

補藥可通融論

古人病愈之後即令食五穀以養之則元氣自復無所謂補藥也。黃農仲景之書豈有補益之方哉。間有別載他書者皆託名也。自唐千金翼等方出始以養性補益等。各立一門。遂開後世補養服食之法。以後醫家凡屬體虛病後之人。必立補方。以為調理善後之計。若富貴之人。則必常服補藥。以供勞心縱欲之資。而醫家必百計取媚。以順其意。其藥專取貴重辛熱為玉。無非參朮地黃桂附鹿茸之類。託名祕方異傳。其氣體合宜者。一時取效。久之必得風痺陰酒等疾。隱受其害。雖死不悔。此等害人之說。固不足論。至體虛病後補藥之方。自當因人而施。視藏府之所偏而損益之。其藥亦不外陰陽氣血。擇和平之藥數十種。相為出入。不必如治病之法。一味不可移易也。故立方只問其陰陽藏府。何者專重而已。況膏丸合就。必經月經時而後服完。若必每日視脈察色。而後服藥。則必煩一日換一丸方矣。故凡服補藥。皆可通融者也。其有神其說。過為艱難慎重。取貴僻之藥。以為可以却病長生者。非其人本愚昧。即欲以之欺人耳。

輕藥愈病論

古語有不服藥為中醫之說。自宋以前已有之。蓋因醫道失傳。治人多誤。病者又不能辨醫之高下。故不服藥。雖不能愈病。亦不至為藥所殺。況病苟非死症。外感漸退。內傷漸復。亦能自愈。故云中醫。此過于小心之法也。而我以為病之在人。有不治自愈者。有不治難愈者。有不治竟不愈而死者。其自愈之疾。誠不必服藥。若難愈及不愈之疾。固當服藥。乃不能知醫之高下。藥之當否。不敢以身嘗試。則莫若擇平易輕淺有益無損之方。以備酌用。小誤亦無害。對病有奇功。此則不止于中醫矣。如偶感風寒。則用葱白蘇葉湯。取微汗。偶傷飲食。則用山楂麥芽等湯消食。偶感暑氣。則用六一散。廣霍湯清暑。偶傷風熱。則用燈心竹葉湯清火。偶患腹瀉。則用陳茶佛手湯和腸胃。如此之類。不一而足。即使少誤。必無大害。又有其藥似

平常而竟有大誤者不可不知如腹痛嘔逆之症寒亦有之熱亦有之暑氣觸穢亦有之或見此症而飲以生薑湯如果屬寒不散寒而用生薑熱性之藥至寒氣相鬪已非正治然猶有得效之理其餘三症飲之必危曾見有人中暑而服濃薑湯一椀覆杯即死若服紫蘇湯寒即立散暑熱亦無害蓋紫蘇性發散不拘何症皆能散也故雖極淺之藥而亦有深義存焉此又所宜慎也凡人偶有小疾能擇藥性之最輕淡者隨症飲之則服藥而無服藥之誤不服藥而有服藥之功亦養生者所當深考也

腹內癱論

古之醫者無分內外又學有根柢故能無病不識後世內外科既分則顯然為內症者內科治之顯然為外症者外科治之其有病在腹中內外未顯然者則各執一說各擬一方歷試諸藥皆無效驗輕者變重重者即殞矣此等症不特外科當知之即內科亦不可不辨明真確知非己責即勿施治毋至臨危束手而後委他人也腹內之癱有數症有肺癱有肝癱有胃脘癱有小腸癱有大腸癱有膀胱癱惟肺癱咳吐腥痰人猶易辨餘者或以為痞結或以為瘀血或以為寒痰或以為食積醫藥雜投及至成膿治已無及并有不及成膿而死者病者醫者始終不知何以致死比比然也今先辨明痞結瘀血寒痰食積之狀凡痞結瘀血必有所因且由漸而成寒痰則痛止無定又必另現痰症食積則必有受傷之日且三五日後大便通即散惟外症則痛有常所而遷延益甚金匱云諸脈浮數應當發熱而反淅淅惡寒若有痛處當發其癰以手按腫上熱者有膿不熱者無膿此數句乃內癱真諦也又云腸癱之為病身甲錯腹皮急按之濡如腫狀腹無積聚身無熱是也若肝癱則肋內隱隱痛日久亦吐膿血小腸癱與大腸相似而位略高膀胱癱則痛在少腹之下近毛際着皮即痛小便亦艱而痛胃脘癱則有虛實二種其實者易消若成膿必大吐膿血而愈惟虛症則多不治先胃中痛脹久而心下漸高其堅如石或有寒熱飲食不進按之

尤痛形體枯瘦此乃思慮傷脾之症不待癰成即死故凡腹中有一定痛處是寒倦臥不能食者皆當審察防成內癰甚毋因循求治于不明之人以至久而膿潰自傷其生也

圍藥論

外科之法最重外治而外治之中尤當圍藥凡毒之所最忌者散大而頂不高蓋人之一身豈能無七情六慾之伏火風寒暑溼之留邪食飲痰涎之積毒身無所病皆散處退藏氣血一聚而成癰腫則諸邪四面皆會惟圍藥能截之使不併合則周身之火毒不至矣其已聚之毒不能透出皮膚勢必四布為害惟圍藥能束之使不散漫則氣聚而外洩矣如此則形小頂高易膿易潰矣故外治中之圍藥較之他藥為特重不但初起為然即成膿收口始終賴之一日不可缺若世醫之圍藥不過三黃散之類每試不效所以皆云圍藥無用如有既破之後而仍用圍藥者則羣然笑之故極輕之毒往往至于散起而不可收拾者皆不用圍藥之故也至于圍藥之方亦甚廣博大段以消疫拔毒束肌收火為主而寒熱攻提和平猛厲則當隨症去取世人不深求至理而反輕議圍藥之非安望其術之能工也

難經論

難經非經也以經文之難解者設為問難以明之故曰難經言以經文為難而釋之也是書之旨蓋欲推本經旨發揮至道剖析疑義垂示後學真讀內經之津梁也但其中亦有未盡善者其問答之詞有即引經文以釋之者經文本自明顯引之或反遺其要以至經語反晦或則無所發明或則與兩經相背或則以此誤彼此其所短也其中有自出機杼發揮妙道未嘗見於內經而實能顯內經之奧義補內經之所未發此蓋別有師承足與內經並垂千古不知創自越人乎抑上古亦有此書而越人引以為証乎自隋唐以來其書盛著尊崇之者固多而無能駁正之者蓋業醫之輩讀難經而識其大義已為醫道中傑出

之流安能更深考內經求其異同得失乎。古今流傳之載籍凡有舛誤後人無敢議者。比比然也。獨難經乎哉。餘詳余所著難經釋中。

傷寒論論

仲景傷寒論編次者不下數十家。因致聚訟紛紛。此皆不知仲景作書之旨故也。觀傷寒敘所述。乃為庸醫誤治而設。所以正治之法一經不過三四條。餘皆救誤之法。故其文亦變動不居。讀傷寒論者。知此書皆設想懸擬之書。則無往不得其義矣。令人必改叔和之次序。或以此條在前。或以此條在後。或以此症因彼症而生。或以此經因彼經而變。互相詬厲。孰知病變萬端。傳經無定。古人因病以施方。無編方以待病。其原本次序。既已散亡。庶幾叔和所定為可信。何則。叔和序例云。今搜採仲景舊論錄其症候。診脈聲色對病。真方有神。驗者擬防世急。則此書乃叔和所搜集。而世人輒加辨駁。以為原本不如此。抑思苟無叔和安有此書。且諸人所編。果能合仲景原文否耶。夫六經現症。有異有同。後人見陽經一症。雜于陰經之中。以為宜改入陽經之內。不知陰經亦有此症也。人各是其私。反致古人圖機活法。泯沒不可問矣。凡讀書能得書中之精義要訣。歷歷分明。則任其顛倒錯亂。而我心自能融會貫通。否則徒以古書紛更互異。愈改愈晦矣。

金匱論

金匱要略乃仲景治雜病之書也。其中缺略處頗多。而上古聖人以湯液治病之法。惟賴此書之存。乃方書之祖也。其論病皆本於內經。而神明變化之。其用藥悉本於神農本草。而融會貫通之。其方則皆上古聖人歷代相傳之經方。仲景間有隨症加減之法。其脈法亦皆內經及歷代相傳之真訣。其治病無不精切周到。無一毫遊移參錯之處。實能洞見本源。審察毫末。故所投必效。如桴鼓之相應。真乃醫方之經也。

惜其所載諸病未能全備未知有殘缺與否然諸大症之綱領亦已粗備後之學者以其為經而參考推廣之已思過半矣自此以後之書皆非古聖相傳之真訣僅自成一派不可與金匱並列也

脈經論

王叔和著脈經分門別類條分縷晰其原亦本內經而漢以後之說一無所遺其中旨趣亦不能盡一使人有所執持然其匯集羣書使後世有所考見亦不可少之作也愚按脈之為道不過驗其血氣之盛衰寒熱及邪氣之流在何經何臟與所現之症參觀互考以究其生尅順逆之理而後吉凶可憑所以內經難經及仲景之論脈其立論反若甚疏而應驗如神若執脈經之說以為某病當見某脈某脈當得某病雖內經亦間有之不如是之拘泥繁瑣也試而不驗於是或咎脈之不準或咎病之非真或咎方藥之不對症而不知皆非也蓋病有與脈相合者有與脈不相合者兼有與脈相反者同一脈也見于此症為宜見於彼症為不宜同一症也見某脈為宜見某脈為不宜一病可見數十脈一脈可現數百症變動不拘若泥定一說則從脈而症不合從症而脈又不合反令人徬徨無所適從所以古今論脈之家彼此互異是非各別人持一論得失相半總由不知變通之精義所以愈密而愈疏也讀脈經者知古來談脈之詳密如此因以考其異同辨其得失審其真偽窮其變通則自有心得若欲泥脈以治病必至全無把握學者必當先參乎內經難經及仲景之說而貫通之則胸中先有定見後人之論皆足以廣我之見聞而識力愈真此讀脈經之法也

千金方外臺論

仲景之學至唐而一變仲景之治病其論藏府經絡病情傳變悉本內經而其所用之方皆古聖相傳之經方並非私自造間有加減必有所本其分兩輕重皆有法度其藥悉本於神農本草無一味游移假

借之處非此方不能治此病非此藥不能成此方精微深妙不可思議藥味不過五六品而功用無不周此乃天地之化機聖人之妙用與天地同不朽者也。千金方則不然其所論病未嘗不依內經而不無雜以後世臆度之說其所用方亦皆採擇古方不無兼取後世偏雜之法其所用藥未必全本於神農兼取雜方單方及通治之品故有一病而立數方亦有一方而治數病其藥品有多至數十味者其中對症者固多不對症者亦不少故治病亦有效有不效大抵所重而在於藥而古聖製方之法不傳矣此醫道之一大變也然其用藥之奇用意之巧亦自成一家有不可磨滅之處至唐王焘所集外臺一書則纂集自漢以來諸方匯萃成書而歷代之方於焉大備但其人本非崇家之學故無所審擇以為指歸乃醫方之類書也然唐以前之方賴此書以存其功亦不可泯但讀之者苟胸中無成竹則舉說紛紜摩方消雜反茫然失其所據故讀千金外臺者必精通於內經仲景本草等書胸中先有成見而後取其長而舍其短則可資我博採之益否則反亂人意而無所適從嗟乎千金外臺且然況後世偏駁雜亂之書能不惑人之心志哉等而下之更有無稽杜撰之邪書尤不足道矣

活人書論

宋人之書能發明傷寒論使人有所執持而易曉大有功於仲景者活人書為第一蓋傷寒論不過隨舉六經所現之症以施治有一症而六經皆現者並有一症而治法迥別者則讀者茫無把握矣此書以經絡病因傳變疑似條分縷晰而後附以諸方治法使人一覽了然豈非後學之津梁乎其書獨出機杼又能全本經文無一字混入己意豈非好學深思述而不作足以繼往開來者乎後世之述傷寒論者唐宋以來已有將經文刪改移易不明不貫至近代前條辨尚論編等書又復顛倒錯亂各逞意見互相辨駁總由分症不清欲其強合所以日就支離若能參究此書則任病情之錯綜反覆而治法仍歸一定何必

聚訟紛紜致古人之書愈講而愈晦也

太素脈論

診脈以之治病其血氣之盛衰及風寒暑濕之中人可驗而知也乃相傳有太素脈之說以候人之壽夭窮通智愚善惡纖悉皆備夫脈乃氣血之見端其長而堅厚者為壽之徵其短小而薄弱者為夭之徵清而有神為智之徵濁而無神為愚之徵理或宜然若善惡已不可知窮通則與脈何與然或得壽之脈而其人或不僅于風寒勞倦患病而短得夭之脈而其人愛護調攝得以永年又有血氣甚清而神志昏濁者形質甚濁而神志清明者即壽夭智愚亦不能皆驗況其他乎又書中更神其說以為能知其年得某官某年得財若干父母何人子孫何若則更荒唐矣天下或有習此術而言多驗者此必別有他術以推測而倖中借此以神其說耳若盡于脈見之斷斷無是理也

婦科論

婦人之疾與男子無異惟經期胎產之病不同且多癥瘕之疾其所以多癥瘕之故亦以經帶胎產之血易於凝滯故較之男子為多故古人名婦科謂之帶下醫以其病總屬于帶下也凡治婦人必先明衝任之脈衝脈起于氣街在毛際兩旁並少陰之經挾臍上行至胸中而散任脈起于中極之下臍旁四寸以上毛際循腹裏上關元又云衝任脈皆起于胞中上循背裏為經脈之海此皆血之所從生而胎之所由繫明于衝任之故則本原洞悉而後其所生之病千條萬緒以可知其所從起更參合古人所用之方而神明變化之則每症必有傳受不概治以男子泛用之藥自能所治輒效矣至如世俗相傳之邪說如胎前宜涼產後宜溫等論夫胎前宜涼理或有之若產後宜溫則脫血之後陰氣大傷孤陽獨熾又瘀血未淨結為蘊熱乃反用薑桂等藥我見時醫以此殺人無數觀仲景先生於產後之疾以石膏白薇竹茹等藥治之無

不神效或云產後瘀血得寒則凝得熱則行此大謬也凡瘀血凝結因熱而凝者得寒降而解因寒而凝者得熱降而解如桃仁承氣湯非寒散而何未聞此湯能凝血也蓋產後瘀血熱結為多熱瘀成塊更益以熱則煉成乾血永無解散之日其重者陰涸而即死輕者成堅痞褥勞等疾惟實見其真屬寒氣所結之瘀則宜用溫散故凡治病之法不本於古聖而反宗後人之邪說皆足以害人諸科皆然不獨婦科也

痘科論

今天下之醫法失傳者莫如痘疹痘之源藏於臟腑骨髓而發于天時所謂本于臟腑骨髓者凡人受生之初陰陽二氣交感成形其始因火而動則必有渣滓未融之處伏于臟腑骨髓之中此痘之本源也然外無感召則伏而不出及天地寒暑陰陽之氣沴戾日積與人身之臟腑氣血相應則其毒隨之而越此發于天時者也而天時有五運六氣之殊標本勝復之異氣體既稟受不同感發又隨時各別則治法必能通乎造化之理而補救之此至精至微之術也奈何以寒涼伐之毒藥劫之哉夫痘之源不外乎火固也然內經云火鬱則發之其遇天時炎熱火甚易發者清解固宜若冬夏之際氣為寒束則不起發發而精血不死則無漿漿而精血不繼即不靨則溫散提托補養之法缺一不可豈得概用寒涼至其用蚯蚓桑蟲金蝎等毒藥為禍尤烈夫以毒攻毒者謂毒氣內陷一時不能托出則借其力以透發之此皆危篤之症千百中不得一者乃視為常用之藥則無毒者反益其毒矣病家因其能知死期故死而不怨孰知服彼之藥無有不死非其識見之高乃其用藥之靈也故症之生死全賴氣血當清火解毒者則清火解毒當培養氣血者則溫託滋補百不失一矣嗚呼謬說流傳起於明季至今尤甚惟以寒藥數品按日定方不效則繼以毒藥如此而已夫以至變至微之病而立至定至粗之法於是羣以為痘科最易不知殺人亦最多也

附種痘說

種痘之法此仙傳也有九善焉凡物欲其聚惟痘不欲其聚痘未出而強之出則毒不聚一也凡物欲其多痘欲其少強之出必少二也凡物欲其大痘欲其小強之出必小三也不感時痘之戾氣四也擇天地溫和之日五也擇小兒無他病之時六也其痘苗皆取種出無毒之善種七也凡痘必漿成十分而後毒不隱種痘之漿五分以上即無害八也凡痘必十二朝成靨并有延至一月者種痘則九朝已回九也其有種而死者深用悔恨不知種而死者則自出斷無不死之理不必悔也至於種出危險之痘或生痘毒此則醫家不能用藥之故種痘之人更能略知治痘之法則尤為十全矣

幼科論

幼科古人謂之啞科以其不能言而不知病之所在也此特其一端耳幼科之病如變蒸胎驚之類與成人異者不可勝舉非若婦人之與男子異者止經產數端耳古人所以另立專科其說精詳明備自初生以至成童其病名不啻以百計其治法立方種種各別又婦人之與男子病相同者治亦相同若小兒之與成人即病相同者治亦迥異如傷食之症反有用巴豆礪砂其餘諸症多用金石峻厲之藥特分兩極少耳此古人真傳也後世不敢用而以草木和平之藥治之往往遷延而死此醫者失傳之故至于調攝之法病家能知之者千不得一蓋小兒純陽之體最宜清涼令人非太燥即太飽而其尤害者則在于有病之後而數與之乳乳之為物得熱則堅韌如棉絮況兒有病則食乳甚稀乳久不食則愈充滿一與之吮則迅疾湧出較平日之下咽更多前乳未消新乳復充填積胃口化為頑痰痰火相結諸脈皆閉而死矣譬如常人平日食飯幾何當病危之時其食與平時不減安有不死者哉然嗚病家云乳不可食則羣相詰曰乳猶水也食之何害况兒虛如此全賴乳養若復禁乳則餓死矣不但不肯信反將醫者詬罵其

餘之不當食而食與當食而反不與之食種種失宜不可枚舉醫者豈能坐守之使事事合節耶況明理之醫能知調養之法者亦自不得一故小兒之所以難治者非盡不能言之故也

瘍科論

瘍科之法全在外治其手法必有傳授凡辨形察色以知吉凶及先後施治皆有成法必讀書臨症二者皆到然後無誤其升降圍點去腐生肌呼膿止血膏塗洗髮等方皆必純正和平屢試屢驗者乃能應手而愈至于內服之方護心托毒化膿長肉亦有真傳非尋常經方所能奏效也惟煎方則必視其人之強弱陰陽而為加減此則必通于內科之理全在學問根柢然又與內科不同蓋煎方之道相同而其藥則有某毒主某藥某症主某方非此不效亦另有傳授焉故外科總以傳授為主徒恃學問之宏博無益也

有傳授則較之內科為尤易惟外科而兼內科之症或其人本有宿疾或患外症之時復感他氣或因外症重極內傷藏府則不得不兼內科之法治之此必平日講于內科之道而通其理然後能兩全而無失若不能治其內症則并外症亦不可救此則全在學問深博矣若為外科者不能兼則當另請名理內科為之定方而為外科者參議于其間使其藥與外症無害而後斟酌施治則庶幾兩有所益若其所現內症本因外症而生如痛極而昏暈膿成而生寒熱毒內陷而脹滿此則內症皆由外症而生只治其外症而內症已愈此又不必商之外科也但其道甚微其方甚奧亦非淺學者所能知也故外科之道淺言之則惟記煎方數百合膏圍藥幾料已可以自名一家若深言之則經絡藏府氣血骨脈之理及奇病怪疾千態萬狀無不盡識其方亦無病不全其珍奇貴重難得之藥亦無所不備雖遇極奇極險之症亦了然無疑此則較之內科為更難故外科之等級高下懸殊而人之能識其高下者亦不易也

祝由科論

祝由之法內經賊風篇岐伯曰先巫知百病之勝先知其病所從生者可祝而已也又移精變氣論岐伯云古恬憺之世邪不能深入故可移精祝由而已今人虛邪賊風內著五藏骨髓外傷空竅肌膚所以小病必甚大病必死故祝由不能已也由此觀之則祝由之法亦不過因其病情之所由而宣意導氣以釋疑而解惑此亦必病之輕者或有感應之理若果病機深重亦不能有效也古法今已不傳近所傳符咒之術間有小效而病之大者全不見功蓋岐伯之時已然況後世哉存而不論可也

獸醫論

禽獸之病由于七情者少由于風寒飲食者多故治法較之人為猶易夫禽獸之藏府經絡雖與人殊其受天地之血氣不甚相遠故其用藥亦與人大略相同但其氣粗血濁其所飲食非人之飲食則藥亦當別有主治不得盡以治人者治之矣如牛馬之食則當用消草之藥犬豕之食則當用消糠豆之藥是也又有專屬之品如楸宜烏藥馬宜黃藥之類而其病亦一獸有一獸獨患之病此則另有專方主治餘則與人大段相同但必劑大而力厚之方取效為易其中又有天運時氣之不同變化多端亦必隨症加減此理亦廣博深奧與治人之術不相上下今則醫人之醫尚絕傳況獸醫乎

四大家論

醫道之晦久矣明人有四大家之說指張仲景劉河間李東垣朱丹溪四人謂為千古醫宗此真無知妄談也夫仲景先生乃千古集大成之聖人猶儒宗之孔子河間東垣乃一偏之學丹溪不過斟酌諸家之言而調停去取以開學者便易之門此乃世俗之所謂名醫也三子之于仲景未能望見萬一乃躋而與之並稱豈非絕倒如扁鵲倉公王叔和孫思邈輩則實有師承各操絕技然亦僅成一家之言如儒家漢唐諸子之流亦斷斷不可與孔子並列況三人哉至三人之高下劉則尚崇內經而實不能得其精義朱

則平易淺近未觀本原至于東垣執高理脾胃之說純用升提香燥意見偏而方法亂貽誤後人與仲景正相反後世頗宗其說皆由世人之于醫理全未夢見所以為所惑也更可駭者以仲景有傷寒論一書則以為高明傷寒金匱要略則以為不可依以治病其說荒唐更甚吾非故欲輕三子也蓋此說行則天下惟知竊三子之緒餘而不深求仲景之學則仲景延續先聖之法從此日衰而天下萬世天札載途其害不少故當亟正之也

醫家論

醫之高下不齊此不可勉強者也然果能盡智竭謀小心謹慎猶不至于殺人更加以詐偽萬端其害不可窮矣或立奇方以取異或用僻藥以惑眾或用參茸補熱之藥以媚富貴之人或假托仙佛之方以欺愚魯之輩或立高談怪論驚世盜名或造假經偽說瞞人駭俗或明知此病易曉偽說彼病以示奇如冬月傷寒強加香蒿于傷寒方內而愈以為此暑病也不知香蒿乃其惑人之法也如本係熱症強加乾姜于涼藥之內而愈以為此真寒也不知彼之乾姜乃泡過百次而無味者也于外科則多用現成之藥尤不可辨其立心尤險先使其瘡極大令人驚惶而後治之并有能發不能收以至斃者又有偶得一方如五灰膏三品一條鎗之類不顧人之極痛一概用之哀號欲絕全無憐憫之心此等之人不過欲欺人圖利即使能知一二亦為私欲所汨沒安能奏功效醫者能正其心術雖學不足猶不至于害人況果能虛心篤學則學日進學日進則每治必愈而聲名日起自然求之者眾而利亦隨之若專于求利則名利必兩失醫者何苦舍此而蹈彼也

醫學淵源論

醫家之最古者內經則醫之祖乃岐黃也然本草起于神農則又在黃帝之前矣可知醫之起起于藥也

至黃帝則講夫經絡藏府之原內傷外感之異與夫君臣佐使大小奇偶之制神明夫用藥之理醫學從此大備然其書講人身藏府之形七情六淫之感與針灸雜法為多而製方尚少至伊尹有湯液治病之法然亦得之傳聞無成書可考至扁鵲倉公而湯藥之用漸廣張仲景先生出而雜病傷寒高以方藥為治遂為千古用方之祖而其方亦俱原本神農黃帝之精義皆從古相傳之方仲景不過集其成耳自是之後醫者以方藥為重其于天地陰陽經絡藏府之道及針灸雜術往往不甚考求而治病之法從此一變唐宋以後相尋彌甚至元之劉河間張潔古等出未嘗不重內經之學凡論病必先敘經文而後採取諸家之說繼乃附以治法似為得旨然其人皆非通儒不能深通經義而于仲景制方之義又不能深考其源故其說非影響即支離各任其偏而不歸于中道其尤偏駁者李東垣為甚惟以溫燥脾胃為玉其方亦毫無法度因當時無真實之學盜竊虛名故其教至今不絕至明之薛立齋尤浮泛荒謬猶聖賢之學變而為腐爛時文何嘗不曰我明經學古者也然以施之治天下果能如唐虞三代者乎既不知神農黃帝之精義則藥性及藏府經絡之源不明也又不知仲景制方之法度則病變及施治之法不審也惟曰某病則用某方如不效改用某方更有一方服至二三十劑令病者遷延自愈者胸中毫無把握惟以簡易為主自此以降流弊日甚而枉死載途矣安得有參本草窮內經熟金匱傷寒者出而挽救其弊以全民命乎其害總由于習醫者皆貧苦不學之人端以此求衣食故祇記數方遂以之治天下之病不復更求他法故其禍遂至于此也

考試醫學論

醫為人命所關故周禮醫師之屬掌于冢宰歲終必稽其事而制其食至宋神宗時設內外醫學置教授及諸生皆分科考察陞補元亦仿而行之其考試之文皆有程式未知當時得人何如然其慎重醫道之

意未嘗異也。故當時立方治病，猶有法度。後世醫者，大概皆讀書不就，商賈無資，不得已而為衣食之計。或偶涉獵肆中，勦襲醫書，或托名近地時醫門下，始則欲以欺人，久之亦自以為醫術不過如此。其誤相仍，其害無盡。岐黃之精義幾絕矣。若欲斟酌古今考試之法，必訪求世之實有師承、學問淵博、品行端方之醫。如宋之教授，令其嚴考諸醫，取其許掛牌行道。既行之後，亦復每月嚴課。或有學問荒疏，治法謬誤者，小則撤牌讀書，大則飭使改業。教授以上，亦如周禮醫師之有等。其有學問出眾，治效神妙者，候補教授。其考試之法，分為六科。曰針灸，曰大方，曰婦科，曰幼科，兼痘科，曰眼科，曰外科。其能諸科皆通者，曰全科。通一二科者，曰兼科。通一科者，曰專科。其試題之體有三：一曰論題，出靈樞素問發明經絡藏府五運六氣寒熱虛實補瀉逆從之理；二曰解題，出神農本草傷寒論金匱要略考訂藥性病變製方之法；三曰案自述，平日治病之驗否，及其所以用此方治此病之意。如此考察自然言必本于聖經，治必遵乎古法。學有淵源，而師承不絕矣。豈可聽涉獵杜撰，全無根柢之人，以人命為兒戲乎。

醫非人人可學論

今之學醫者，皆無聊之甚。習此業以為衣食之計，且孰知醫之為道，乃古聖人所以洩天地之祕，奪造化之權，以救人之死。其理精妙入神，非聰明敏哲之人不可學也。黃帝神農，越人仲景之書，文詞古奧，搜羅廣遠，非淵博通達之人不可學也。凡病之情，傳變在于頃刻，真偽一時難辨，一或執滯，生死立判，非虛懷靈變之人不可學也。病名以千計，病症以萬計，藏府經絡，內服外治，方藥之書，數年不能竟其說，非勤讀書記之人不可學也。又內經以後，支分派別，人自為師，不無偏駁，更有怪僻之論，鄙俚之說，紛陳錯立，淆白端一，或誤信終身不返，非精鑒確識之人不可學也。故為此道者，必具過人之資，通人之識，又能屏外事，專心數年，更得師之傳授，方能與古聖人之心潛通默契。若今之學醫者，與前數端事事相反，以

通儒畢世不能工之事。乃以全無文理之人。欲頃刻而能之。宜道之所以日喪而枉死者徧天下也。

名醫不可為論

為醫固難。而為名醫尤難。何則。名醫者。聲價甚高。敦請不易。即使有力可延。又恐往而不遇。即或可遇。其居必非近地。不能旦夕可至。故病家凡屬輕小之疾。不即延治。必病勢危。為近醫束手。舉家以為危。然後求之。夫病勢而人人以為危。則真危矣。又其病必遷延日久。屢易醫家。廣試藥石。一誤再誤。病情數變。已成壞症。為名醫者。豈真有起死回生之術哉。病家不明此理。以為如此大名。必有回天之力。若亦如他醫之束手。亦何以異于人哉。于是望之甚切。責之甚重。若真能操人生死之權者。則當之者。難為情矣。若此病斷然必死。則明示以不治之故。定之死期。飄然而去。猶可免責。倘此症萬死之中。猶有生機一線。若用輕劑。以塞責。致病人萬無生理。則于心不安。若用重劑。以背城一戰。萬一有變。則謗議蜂起。前人誤治之責。盡歸一人。雖當定方之時。未嘗不明白言之。然人情總以成敗為是非。既含我之藥。而死。其咎不容諉矣。又或大病差後。元氣虛而餘邪尚伏。善後之圖。尤宜深講。病家不知。失于調理。愈後復發。仍有歸咎于醫之未善者。此類甚多。故名醫之治病。較之常醫倍難也。知其難。則醫者固宜慎之又慎。而病家及傍觀之人。亦宜曲諒也。然世又有獲虛名之時。醫到處誤人。而病家反云此人治之而不愈。是亦命也有殺人之實。無殺人之名。此必其人別有巧術。以致之不在常情之內矣。

邪說陷溺論

古聖相傳之說。揆之于情。有至理。驗之于疾。有奇效。然天下之人。反甚疑焉。而獨于無稽之談。義所難通。害又立見者。人人奉以為典訓。守之不敢失者。何也。其所由來久矣。時醫之言曰。古方不可以治今病。嗟乎。天地之風寒暑濕燥火。猶是也。生人七情六慾。猶是也。而何以古人用之則生。今人用之則死。不知古

人之以某方治某病者先審其病之確然然後以其方治之若今人之所謂某病非古人之所謂某病也如風火雜感症類傷寒實非傷寒也乃亦以大劑桂枝湯汗之重者吐血狂躁輕者身熱悶亂于是罪及仲景以為桂枝湯不可用不自咎其辨病之的而咎古方之誤人豈不謬乎所謂無稽之邪說如深秋不可用白虎白虎乃傷寒陽明之藥傷寒皆在冬至以後尚且用之何以深秋已不可用又謂痢疾血症皆無止法夫痢血之病屬實邪有瘀者誠不可以遽止至于滑脫空竭非止不為功但不可塞其火邪耳又謂餓不死之傷寒喫不死之痢疾夫傷寒論中以能食不能食驗中寒中風之別其中以食不食辨症之法不一而足況邪方退非扶其胃氣則病變必多宿食欲行非新穀入胃則腸中之氣必不下達但不可過用耳執餓不死之說而傷寒之禁其食而餓死者多矣謂痢疾為喫不殺者乃指人之患痢非喋口而能食者則其胃氣尚強其病不死故云然非謂痢疾之人無物不可食執喫不殺之說而痢疾之過食而死者多矣此皆無稽之談不可枚舉又有近理之說而謬解之者亦足為害故凡讀書議論必審其所以然之故而更精思歷試方不為邪說所誤故聖人深惡夫道聽塗說之人也

涉獵醫書誤人論

人之死誤于醫家者十之三誤于病家者十之三誤于旁人涉獵醫書者亦十之三蓋醫之為道乃通天徹地之學必全體明而後可以治一病若全體不明而偶得一知半解舉以試人輕淺之病或能得效至于重大疑難之症亦以一偏之見妄議用藥一或有誤生死立判矣間或偶然倖中自以為如此大病猶能見功益復自信以後不拘何病輒妄加議論至殺人之後猶以為病自不治非我之過于是終身害人而不悔矣然病家往往多信之者則有故焉蓋病家皆不知醫之人而醫者寫方即去見有稍知醫理者議論鑿鑿又關切異常情面甚重自然聽信誰知彼乃偶然繙閱及道聽塗說之談彼亦未嘗審度從我

之說病者如何究竟而病家已從之矣又有文人墨客及富貴之人文理本優偶爾檢點醫書自以為已
有心得傍人因其平日稍有學問品望倍加信從而世之醫人因自己全無根柢辨難反出其下於是深
加佩服彼以為某乃名醫尚不如我遂肆然為人治病愈則為功死則無罪更有執一偏之見恃其文理
之長更著書立說貽害後世此等之人不可勝數嗟乎古之為醫者皆有師承而又無病不講無方不通
一有邪說異論則引經據典以折之又能實有把持所治必中故餘人不得而參其末議今之醫者皆全
無本領一書不讀故涉獵醫書之人反出而臨乎其致病家亦鄙薄醫者而反信夫涉獵之人以致害
人如此此其咎全在醫中之無人故人得而操其長短也然涉獵之人久而自信益真始誤他人繼誤
骨肉終則自誤其身我見甚多不可不深省也

病家論

天下之病誤於醫家者固多誤於病家者尤多醫家而誤易良醫可也病家而誤其弊不可勝窮有不問
醫之高下即延以治病其誤一也有以耳為目聞人譽其醫即信為真不考其實其誤二也有平日相熟
之人務取其便又慮別延他人覺情面有虧而其人又叨任不辭希圖酬謝古人所謂以性命當人情其
誤三也有遠方邪人假稱名醫高談闊論欺騙愚人遂不復詳察信其欺妄其誤四也有因至親密友或
勢位之人薦引一人情分難却勉強延請其誤五也更有病家戚友偶閱醫書自以為醫書頗通每見立
方必妄生議論私改藥味善則歸己過則歸人或各薦一醫互相毀謗遂成黨援甚者各立門戶如不從
己反幸災樂禍以期必勝不顧病者之死生其誤七也又或病勢方轉未收全功病者正疑見效太遲忽
而讒言鋒起中道變更又換他醫遂至危篤反咎前人其誤八也又有病變不常朝當桂枝暮當苓連又
有純虛之體其症反宜用硝黃大實之人其症反宜用參朮病家不知以為怪僻不從其說反信庸醫其


誤九也。又有吝惜錢財，惟賤是取，況名醫皆自作主張，不肯從我，反不若某某等和易近人，柔順受商酬謝可略。扁鵲云：輕身重財，不治其誤十也。此猶其大端耳。其中更有用參附則喜，用攻劑則懼，服參附而死，則委之命，服攻伐而死，則咎在醫。使醫者不敢對症用藥，更有製藥不如法煎藥不合度服藥非其時，更或飲食起居寒暖勞逸喜怒語言不時不節，難以枚舉。小病無害，若大病則有一不合，皆足以傷生。然則為病家者，當何如在？謹擇名醫而信任之。如人君之用宰相，擇賢相而專任之，其理一也。然則擇賢之法，若何？曰：必擇其人品端方，心術純正，又復詢其學有根柢，術有淵源，歷考所治果能十全八九，而後延請施治。然醫各有所長，或令所患非其所長，則又有誤。必細聽其所論，切中病情，和平正大，又用藥必能命中，然後託之。所謂命中者，其立方之時，先論定此方所以然之故，服藥之後，如何效驗，或云必得幾劑而後有效，其言無一不驗。此所謂命中也。如此試醫，思過半矣。若其人本無足取，而其說又怪僻不經，或游移恍惚，用藥之後，與其所言全不相應，則即當另覓名家，不得以性命輕試。此則擇醫之法也。

醫者誤人無罪論

人命所關亦大矣。凡害人之命者，無不立有報應。乃今之為名醫者，既無學問，又無師授，兼以心術不正，欺世盜名，害人無算，宜有天罰以彰其罪。然往往壽考富厚，子孫繁昌，全無殃咎。我殆甚不解焉。以後日與病者相周旋，而後知人之誤藥而死，半由於天命，半由於病家。醫者不過依違順命，以成其死，並非造謀之人。故殺人之罪，醫者不受也。何以言之？夫醫之良否，有一定之高下，而病家則于醫之良者，彼偏不信。醫之劣者，反信而不疑，言補益者，以為良醫，言攻散者，以為庸醫。言溫熱者，以為有益，言清涼者，以為傷生。或旁人互生議論，或病人自改方藥，而醫者欲其術之行，勢必曲從病家之意。病家深喜其和順，偶獲或愈，醫者自矜其功。如其或死，醫者不任其咎。病家亦自作主張，隱諱其非，不復咎及醫人。故醫者之

曲從病家乃避功避罪之良法也。既死之後聞者亦相傳以為某人之病因誤服某人之藥而死，宜以為戒矣。及至自己得病亦復如此，更有平昔最佩服之良醫，忽然自生疾病，反信平日所最鄙薄之庸醫而傷其生者，是必有鬼神使之。此乃所謂命也。蓋人生死有定數，若必待人之老而自死，則天下皆壽考之人，而命無權故。必生疾病使之不以壽而死，然疾病之輕重不齊，或其人善自保護，則六淫七情之所感甚輕，命本當死，而病淺不能令其死，則命又無權。於是天生此等之醫，分布於天下，凡當死者少得微疾，醫者必能令其輕者重，重者死，而命之權於是獨重。則醫之殺人乃隱然奉天之令，以行其罰，不但無罪，且有微功，故無報也。惟世又有立心欺詐，買弄聰明，造捏假藥以欺嚇人，而取其財者，此乃有心之惡，與前所論之人不同，其禍無不立至。我見亦多矣。願天下之人細思之，真鑿鑿可徵，非狂談也。

醫學源流論卷下終



H87378A

1907

v.2